

四庫全書

史部

欽定四庫全書

竹書統箋卷五

翰林院檢討徐文靖撰

殷商成湯

箋按詩商頌譜曰商者契所封之地國語玄王勤商十四世而興是其始稱商也竹書

庚自奄遷于北蒙曰殷玄鳥云殷受命咸宜是其魚稱殷也大明云殷商之旅蕩云咨女殷商是又總稱為殷商也詩補傳曰殷以澨水得名古澨水縣今陳州之商水縣也殷商兼商山澨水言之鄭氏通志曰澨水出陽城東至西華汝陽入于潁與潁水合流古人并謂潁為殷故命以殷焉

名履

湯有七名而九征

按湯名帝乙見易緯名天乙見世本名履見魯論名祖乙見白虎

通曰成湯曰武王見詩是七名也湯始征葛次征荆征温次征韋征頗次征昆吾征夏邑征三陵戰于郟

獲桀焦門是九征也

放桀于南巢而還諸侯八譯而來者千八

百國

按仲虺之誥曰表正萬邦纘禹舊服國策頗觸曰古大禹之世時諸侯萬國及湯之時諸侯

三千奇肱氏以車至乃同尊天乙履為天子三讓遂即

天子之位

按河圖括地象曰奇肱氏能為飛車從風遠行博物志曰湯時西風吹其車至豫

州湯破其車不以示民十年東風至乃復作車遣返而其國去玉門關四萬里初高辛氏之

世妃曰簡狄以春分玄鳥至之日從帝祀郊禘與其妹

浴于玄丘之水

箋按一統志晉丘在開封府祥符縣界內一名清丘又名玄池昔簡狄浴于晉

丘之水有玄鳥遺卵吞之遂生契

有玄鳥銜卵而墜之五色甚好二人

競取覆以玉筐

箋按淮南子曰有娥在不周之北長女簡狄少女建疵

簡狄先得

而吞之遂孕胸剖而生契

箋按白虎通曰殷姓子氏祖以玄鳥子也

長為堯

司徒成功于民受封于商

箋按皇甫謐關駟並以爲上洛商縣

後十三世生

主癸主癸之妃曰扶都見白氣貫月意感以乙日生湯號

天乙豐下銳上哲而有髯

箋按晏子春秋曰湯長頭而髯鬚

向身而揚

聲

箋按向身帝王世紀作倨身

長九尺臂有四肘是為成湯

箋按禮別名記曰湯

臂四肘是謂神翼振  
去不義萬民蕃息

湯在亳能修其德伊摯將應湯命

夢乘舟過日月之旁

箋按孫子兵書曰伊尹名摯庾信銘乘舟相日又詠懷詩乘舟能上

月皆用此也

湯乃東至于洛觀帝堯之壇沉璧退立黃魚雙

踴黑鳥隨之止于壇化為黑玉

箋按魚豢典畧曰湯東觀洛沉璧黃魚雙躍出

于壇帝王世紀曰湯沉璧于洛獲黃魚黑玉之瑞

又有黑龜並赤文成字言夏

桀無道湯當代之

箋按沈約宋書曰元龜洛書者天符也王者德至川泉則洛出龜書

杙之神見于邳山

箋按周語曰商之興也杙杙次于邳山

有神牽白狼銜

鈎而入商朝

箋按尚書璇璣鈴曰湯受金符帝籙白狼銜鈎入庭朝

金德將盛銀

自山溢

箋按漢書郊祀志殷得金德銀自山溢

湯將奉天命放桀夢及

天而舐之遂有天下商人後改天下之號曰殷

箋按

書符瑞志作錫後漢鄧后紀后嘗夢捫天蕩蕩正青若有鐘乳狀乃仰嗽飲之以訊占夢占夢言堯夢攀天而上湯夢及天而舐之斯皆聖王之

十八年癸亥王即位

箋按沈約注帝癸十五年成湯始為諸侯之元年癸在位三十一年

湯放之南巢明年湯始代夏為天子從湯為諸侯元年計之十八年也竹書起堯元年丙子至湯十八年癸亥共五百八十八年故孟子謂由堯舜至湯五百有餘歲也

居亳

箋按書叙曰湯既黜夏命復歸于亳作湯誥又周書殷祝解曰湯放桀而復薄三千諸侯大會湯退

再拜從諸侯之位湯曰此天子位有道者可以處之天子非一家之有也有道者之有也故天下惟有道者理之惟有道者宜久處之湯以此讓三千諸侯莫敢即位然後湯即天子之位古薄與亳通此即孟子所謂湯居亳與葛為鄰後漢郡國志梁國穀熟縣有南亳寧陵縣有葛鄉者也皇甫謐曰孟子稱葛伯不祀湯使亳衆往為之耕若湯居偃師去寧陵八百餘里豈當使民往為之耕乎竹書湯即位居亳蓋南亳也程史曰昔湯之元祀歲星順行與日合於房房宋亳分也則亦以湯代夏之元祀所居為宋亳而非偃師之亳矣書叙曰自契至于成湯八遷從先王居作帝告沃麓此則從克夏歸亳之後復遷于偃師之亳為帝嚳舊居故曰從先王居也孔氏疏曰序所言帝告不知告誰正未審帝告之告當請為嚳古作偁告即嚳從偁省也帝告沃麓者以其因帝偁舊居沃土來遷麓亦來也若湯時代夏稱王何由稱帝告乎史

記殷本紀湯始居亳從先王居作帝誥誥乃借字之  
說傳寫者誤耳孔傳以為作誥告先王則已誤矣

始屋夏社

筭按書叙曰湯勝夏欲遷其社不可作夏社  
疑至臣扈孔疏曰疑至臣扈當是二臣名程

子曰亡國之社遷之禮也湯存之以為後戒故湯既  
勝夏欲遷其社不可春秋書亳社災皆自湯之不遷  
始也又按殷時立四輔有疑  
丞輔弼疑至之疑殆官名也

十九年大旱

氏羗來貢

筭按高頌曰昔有成湯自彼氏羗莫  
敢不來享莫敢不來王是其事也

二十年大旱

夏桀卒于亭山禁弦歌舞

筭按輿地志曰巢縣卧牛山  
後有桀王城晉書地理志注



云桀死于是未詳今据竹書桀卒于亭山是即巢縣之卧牛山矣

## 二十一年大旱鑄金幣

箋按管子曰湯七年旱民之無糧賣子者湯以莊山之金鑄幣

而時民之無糧賣子者漢書食貨志注師古曰凡言幣者所以通貨物易有無也故金之與錢皆名為幣也若然則湯之鑄金幣者蓋鑄金以為幣也橫渠理窟曰幣金玉齒革布帛之雜名是也其後齊桓公令左司馬伯公將白徒鑄錢于莊山蓋又法湯而為之

## 二十二年大旱

箋按漢公孫弘傳武帝元光五年復徵賢良文學上策詔諸儒制曰禹湯水旱

厥咎何由弘對曰臣聞堯遭洪水使禹治之未聞禹之有水也若湯之旱則桀之餘烈也桀紂行惡受天之罪禹湯積德以王天下由此觀之天德無私親順之和起逆之害生此天文地理人事之紀

二十三年大旱

箋按莊子書公孫龍曰湯之時八年七旱墨子曰禹七年水湯五年旱汜勝之

書曰湯有旱災伊尹為區田後漢劉般傳有區種法言區土壅禾根也區與漚同

二十四年大旱王禱于桑林雨

箋按尸子曰湯之救旱也素車白馬布衣身嬰

白茅以身為牲殷本紀曰湯既放桀後大旱七年以身禱于桑林之野祝曰無以余一人之不敏傷民之命以六事自責曰政不節與民失職與宮室崇與女謁盛與苞苴行與讒夫昌與言未已大雨方數千里又按左傳昭二十一年宋城葛壙及桑林之門淮南修武訓湯禱于桑山之林國策張儀說韓王曰秦東取成臯宜陽則鴻臺之宮桑林之苑非王之有矣呂氏春秋湯禱于桑林之社而雨大至又曰立湯後于宋以奉桑林

二十五年作大濩樂

箋按呂氏春秋曰殷湯即位命伊尹作為大濩歌晨露修九招六列孔氏

曰晨露九招六列蓋大獲之別曲名也左傳襄十年宋公享晉侯于楚丘請以桑林社注桑林殷天子之

樂名是大獲因桑林之禱而作也熊氏曰獲護也言湯之寬仁能救護生民也

初巡狩

按鄭志答孫皓曰唐虞之禮五載一巡守夏殷之時天子蓋六年一巡守今湯以連年大旱

故七年初巡狩也

定獻令

按周書曰伊尹朝獻商書湯問伊尹曰諸侯來獻或無馬牛之所生而獻遠方之物事寶相

反不利今吾欲因其地勢之所有獻之必易得而不貴其為四方獻令伊尹受命於是為四方令曰正東

符婁仇州伊慮溫深九夷十蠻越溫鬻文身請令以魚支之鞞烏劍之醬鮫蔽利劍為獻正南甌鄧桂國

損子產里百濮九菑請令以珠璣瑇瑁象齒文犀翠羽菌鶴短狗為獻正西崑崙狗國鬼親枳已闌耳貫

胸雕題離丘漆齒請令以丹青白旄純蜀江歷龍角  
神龜為獻正北空同大夏莎車姑他旦畧貌胡戎翟  
白奴樓煩月氏娥犁其龍東胡請令以素  
駝白玉野馬駒駝駃騠良弓為獻湯曰善

## 二十七年遷九鼎于商邑

箋按墨子曰昔夏后使飛廉  
析金于荆山鑄鼎于昆吾使

翁難雉乙灼白若之龜龜曰鼎成四足而方不炊自  
亨不舉自藏不遷自行乙又言兆之繇曰饗矣逢逢  
白雲一南一北一西一東九鼎既成遷于三國通鑑  
會編曰夏后禹四歲鑄九鼎說文曰禹鑄九鼎荆山  
之下在馮翊懷德縣南王子年拾遺記曰禹鑄九鼎  
五者以應陽法四者以象陰數使工師以雌金為陰  
鼎以雄金為陽鼎鼎中常滿以占氣象之休否又張  
華博物志曰著一千歲而三百莖明夷曰昔夏后莖  
乘龍而登于天而枚占史華陶陶曰吉昔莖徙九  
鼎啓果徙之則是夏后啓時已有遷鼎之事矣左傳

宣三年楚子問鼎王孫滿曰桀有昏德鼎遷于商漢書  
郊祀志禹收九牧之金鑄象九州夏德衰鼎遷于殷帝  
王世紀曰湯即天子位遂遷九鼎于亳至大坳而有慚  
德是湯遷鼎之事也詩商邑翼翼其傳商邑王都也

### 二十九年陟

箋按書營于桐宮密邇先王孔安國曰桐湯  
葬地杜預曰蒙縣西北有亳城中有湯冢皇

覽曰湯冢在濟陰亳縣北東郭去州三里漢劉向傳殷  
湯無葬處師古曰謂不見傳記也蓋是時孔傳未出故  
向亦不知也

### 外丙

箋按殷本紀湯崩太子太丁未立  
而卒于是乃立太丁之弟外丙

### 名勝

### 元年己亥即位居亳命卿士伊尹

箋按己亥誤當是乙  
亥湯十八年為癸亥

二十九年為甲戌  
則外丙元乙亥

## 二年陟

仲壬

箋按殷本紀外丙即位三年崩立外丙之弟仲壬竹書二年陟與孟子同史云三誤

## 名庸

元年丁丑王即位居亳命卿士伊尹

箋按商彝器有丙寅貞銘曰丙寅王

錫博古錄曰商建國始于庚戌歷十七年而有丙寅正在仲壬即位之二年今據竹書仲壬二年乃戊寅

非丙寅也

四年陟

箋按趙岐注孟子外丙立二年仲壬立四年與竹書合邵子經世史不載二王之名程子伊川

以古人謂歲為年外丙方二歲仲壬方四歲張氏經世紀年謂邵子以數推之去外丙仲壬之年乃合于尚書成湯既沒太甲元年之說唐孔氏正義謂班固不見古文謬從史記而章衡通載乃云以紀年推之外丙仲壬合於歲次尚書缺畧而正義之說謬

太甲

箋按殷本紀帝仲壬即位四年崩伊尹迺立太丁之子太甲太甲成湯嫡長孫也

名至

元年辛巳王即位居亳命卿士伊尹

箋按書叙曰成湯既沒太甲元年伊

尹作伊訓肆命徂后書曰惟元祀十有二月乙丑伊尹祀于先王奉嗣王祗見厥祖伊尹乃明言烈祖之成德以訓于王是也史記正義曰湯即位都南亳後徙西亳書三亳阪尹偃師為西亳蒙為北亳即景亳疑燕

為南亳也括地志亳故城在偃師縣西十四里又唐志大衍歷推太甲二年壬午歲冬至應在女六度今據竹書太甲元年辛巳則二年為壬午不與也

伊尹放太甲于桐乃自立

箒按書太甲上曰惟嗣王不惠于阿衡伊尹曰予弗狎于

弗順營于桐宮密邇先王其訓無俾世迷王祖桐宮居夏蔡仲熙引吳氏曰太甲既即位于仲壬之柩前方居憂于仲壬之殯側是也殷本紀帝太甲既立三年不朋暴虐不遵湯法亂德於是伊尹放之于桐宮三年伊尹攝行政當國以朝諸侯孔傳曰桐湯葬地鄭氏曰有王離宮焉太康地記曰尸鄉南有亳坂東有桐城太甲所放處也正義曰尸鄉在偃師西南五里通鑑太甲即位不明厥德顛覆湯之典型伊尹放之于桐宮注曰桐湯墓所在平陽府曲沃縣西南有桐鄉城世傳伊尹放太甲于桐即此按是時太甲居



毫在河南偃師豈有遠之曲沃之理自當從太康記也

附注約按伊尹自立蓋誤以攝政為真爾石曰臣之忠

有幸而忠者也君之立有幸而立者也殷之君臣皆幸而成者噫泥泥接踵界界比肩君可放乎哉其後新取于西魏取于東司馬之有天下其始也未嘗不伊不周其後也未嘗不界不泥皆取伊尹以為嚆矢也孟子曰無伊尹之志則篡也有旨哉

### 七年王潛出自桐殺伊尹

箋按文選陸士衡豪士賦注引紀年太甲潛出自桐殺伊

尹考竹書紀年事事與經史符同獨太甲潛出自桐殺伊一事敢立異議不顧事之有無者彼見夫三晉處晉君子端氏田和遷康公于海上往往托伊尹放太甲之美名明示其可以潛為之謀而殺之故設為

太甲殺尹之說所以寒奸臣之胆而壯衰君之氣也如春秋外傳妹喜與伊尹比而亡夏妲己與膠鬲比而亡周豈必實有是事哉

天大霧三日乃立其子伊陟伊奮命復其父之田宅而

中分之

箋按書叙曰太甲既立不明伊尹放諸桐三年後歸于亳思庸伊尹作太甲三篇夫豈有七年

而仍在桐者此疑為後人所彘入也爾雅地氣發天不應曰霧霧謂之晦郭注言晦冥邢昺曰霧又名晦春秋僖十五年己卯晦震夷伯之廟公羊穀梁皆云晦冥也

附注約按此文與前後不類蓋後世所益

十年大饗于太廟

箋按月令季秋大饗帝注以徧祭為大饗是也書咸有一德伊尹曰七世

之廟可以觀德孔傳曰天子立七廟有德之王則為祖宗其廟不毀故可觀德禮王制天子七廟三昭三穆與太祖之廟而七鄭注曰此周制七者太祖及文王武王二祧與親廟四股則六廟契及湯與二昭二穆夏則五廟無太祖與二昭二穆而已孔疏曰良由不見古文故為此謬說此篇及商書已云七世之廟則天子立七廟王者常禮非獨周人始有七廟也今天子大饗太廟蓋合群廟之主于太祖之廟而徧祭之故曰大饗也又按商頌詩序曰長發大禘也王肅以大禘為殷祭謂禘祭宗廟非祭天也則此所云大饗者其即商頌之大禘乎

初祀方明

箋按漢律歷志伊訓篇曰惟太甲元年十有二月乙丑朔伊尹祀于先王誕資有牧方明

雖有成湯太丁外丙之服以冬至至越第祀先王于方明以配上帝是朔旦冬至之歲也孟康曰方明者神

明之象也以木為之方四尺畫六采東青西白南赤北黑上玄下黃今据竹書太甲十年初祀方明則漢志云元年者誤也

十二年陟

按郡國志濟陰歷城縣皇覽曰太甲有冢在歷山上

沃丁

按殷本紀帝太甲稱太宗太宗崩子沃丁立

名絢

元年癸巳王即位居亳命卿士咎單

按書叙曰咎單作明居孔傳曰咎

單臣名主土地之官作明居民法一篇馬融曰咎單為湯司空是歷仕四世至沃丁命為卿士與尹為左也右

八年祠保衡

箋按書君奭篇公曰在太甲時則有若保衡說命曰昔先正保衡作我先王佑我烈

祖鄭氏曰此三公之官當時為之號也闕駟曰殷帝沃丁之時伊尹卒葬于亳皇甫謐曰伊尹為湯相號阿衡沃丁八年伊尹卒卒年百有餘歲大霧三日沃丁葬之以天子禮書叙曰沃丁既葬伊尹于亳咎單遂訓伊尹事作沃丁

十九年陟

小庚

附注史記作太庚。箋按殷本紀沃丁崩弟太庚立

名辨

元年壬子王即位居亳

箋按小庚小甲雍己元年即位皆不言命卿士者並咎單為相

也

五年陟

小甲

箋按殷本紀帝太庚崩于小甲立  
徐廣曰世表云帝小甲太庚弟也

名高

元年丁巳王即位居亳

十七年陟

雍己

箋按殷本紀帝小  
甲崩弟雍己立

名佃

箋按佃一  
本作佃

元年甲戌王即位居亳

筭按史記曰雍己之時殷道衰諸侯或不至

十二年陟

太戊

筭按殷本紀帝雍己崩弟太戊立据孔氏書傳太戊沃丁弟之子陸氏釋文曰太戊馬云太甲子蓋

太庚為沃丁弟而釋文引馬融所云太甲子甲誤當作庚

名密

元年丙戌王即位居亳命卿士伊陟臣扈

筭按書叙曰大戊贊于伊

陟作伊陟原命周書君奭曰在太戊時則有若伊陟臣扈是也孔傳伊陟伊尹子伊陟原命二篇皆亡今据竹書伊陟始見于太甲七年至此凡六十二年命為卿士

七年有桑穀生于朝

按書叙曰亳有祥桑穀共生于朝伊陟贊于巫咸作咸又四篇孔

傳曰二木合生七日大拱贊告也巫咸臣名皆亡又按小雅鶴鳴篇爰有樹檀其下維穀朱注穀一名楮

惡木也焦氏筆乘曰史記桑穀共生穀樹名皮可為紙穀从木音構穀从禾音谷穀从米音叻今多混

十一年命巫咸禱于山川

按離騷經巫咸將夕降兮王逸注巫咸古神巫也當殷

中宗之世史記封禪書太戊修德桑穀死伊陟贊巫咸巫咸之興自此始索隱曰太史公以巫咸接神事

太戊使咸履祥桑之災所以謂巫咸之興自此始也今按尚書孔氏傳以巫咸為巫氏書明言巫咸又王

家其非巫現可知莊子天運篇巫咸禘曰天有六極五常注巫咸殷相禘名越絕書曰虞山者巫咸所出

也去縣百五里



二十六年西戎來賓

箋按西戎西方之戎禹貢西戎即叙是也殷本紀曰帝雍己立殷道

衰諸侯或不至弟太戊立伊陟為相殷復興諸侯歸之今西戎來賓諸侯可知又按漢書匈奴傳隴西有

繇諸畎戎狄獠之戎歧梁涇漆之北有義渠大荔烏氏朐衍之戎而晉北有林胡樓煩之戎燕北有東胡

山戎各分散谿谷自有君長往往而聚者百有餘戎

王使王孟聘西戎

箋按山海經丈夫國在維鳥北其為人衣冠帶劍郭璞曰殷帝太戊使王

孟採藥從西王母至此絕糧不能進食木實衣木皮終身無妻而生二子鬲贊曰丈夫之國王孟是始即

此聘西戎事也

三十年命費侯仲衍為車正

箋按秦本紀女華生大費是為栢翳舜賜姓嬴氏大

費生子二人一曰大廉二曰若木大廉元孫曰仲衍  
鳥身人言帝太戊聞而卜之使御吉遂致使御而妻  
之又按定元年傳奚仲居薛以為夏車正  
杜注為夏掌車服大夫則車正自夏始也

三十五年作寅車

箋按詩小雅六月疏曰夏后氏曰鈞車殷曰寅車周曰元戎司馬法文也

是寅車始  
太戊也

四十六年大有年

箋按春秋宣十六年大有年左氏公羊皆無傳

五十八年城蒲姑

箋按郡國志下邳取慮縣有蒲姑陂左傳昭十六年齊師至蒲隧杜預曰

縣東有蒲姑陂

六十一年東夷來賓

箋按後漢東夷傳注王制云東方曰夷夷有九種曰畎夷于夷

方夷黃夷白夷赤夷元夷風夷陽夷

七十五年陟

箋按周書無逸曰昔在殷王中宗嚴恭寅畏天命自度治民祇懼不敢荒寧肆中宗

之享國七十有五年孔傳曰太戊也殷家中世尊其德故稱宗

太戊遇祥桑側身修行三年之後遠方慕明德重譯

而至者七十六國商道復興廟為中宗

附注竹書作太宗○箋按

商頌詩序曰烈祖祀中宗也鄭箋曰中宗商王太戊史記曰殷道衰諸侯或不至帝太戊伊陟相殷復興諸侯歸之故稱中宗

仲丁

箋按殷本紀中宗崩子帝仲丁立仲丁書闕不具書叙曰仲丁遷于囂作仲丁今亡

名莊

元年辛丑王即位自亳遷于囂于河上

筭按殷本紀仲丁遷于囂索隱

曰囂亦作囂水經注濟水東逕敖山北詩所謂薄狩于敖者也其山上有城即殷帝仲丁之所遷也括地志滎陽故城在鄭州滎澤縣西南十七里殷時囂地也一統志敖山在鄭州河陰縣西北二十里秦時敖氏築倉其上因以名山非矣

六年征藍夷

筭按後漢東夷傳禁為暴虐諸夷內侵殷湯革命而定之至于仲丁藍夷作寇太子

賢曰仲丁殷太戊之子也竹書紀年仲丁即位征于藍夷也

九年陟

外壬

箋按殷本紀帝仲丁崩弟外壬立

名發

元年庚戌王即位居囂

邳人妫人叛

箋按昭元年傳趙孟曰虞有三苗夏有觀扈商有妫邳周有徐奄杜注妫邳二國商

諸侯邳下邳縣拈地志古  
仇城在陳留縣東五里

十年陟

河亶甲

箋按殷本紀帝外壬崩弟河  
亶甲立河亶甲時殷復衰

名整

元年庚申王即位自囂遷于相

箋按書叙曰河亶甲居相作河亶甲孔傳曰相

地名在河北括地志故殷城在相州內黃縣東南十三里即河亶甲所築都之故名殷城也王伯厚地理

通釋曰河亶甲居相在河北相州安陽木盤庚所都即北冢殷墟南去朝歌城百四十六里竹書紀年盤

庚自奄遷于北冢曰殷墟南去鄴四十里此皆全抄史記正義注誤也史記漢高祖紀項羽王趙將司馬

卬為殷王都朝歌正義曰以商帝盤庚國殷中之地改商為殷在相州安陽縣即北冢殷墟南去朝歌百

三十六里故號殷王殊不知書叙以河亶甲居相祖乙始自相遷耿故世以朝歌北為殷墟若盤庚所徙

改商為殷在梁國蒙縣殷有三亳蒙為北亳曰北蒙非北冢也正義說謬而通釋据之非也

三年彭伯克邳

箋按鄭語史伯曰大彭豷韋為商伯矣韋昭曰陸終第三子曰篋封于大彭彭

城是也時大彭為  
商伯故稱彭伯也

### 四年征藍夷

按藍夷即前仲丁所征者至是復叛故  
征之郡國志南陽棘陽有藍鄉東海伊廬

亦有藍鄉南郡編縣有藍  
口聚不知誰是其地也

### 五年仇人入于班方彭伯韋伯伐班方仇人來賓

按外士

元年邳仇同時而叛越十有三年彭伯克邳則仇人  
勢孤而入于班方彭伯韋伯共伐之韋昭曰豕韋彭  
姓之別封二國相繼為商伯漢韋賢傳以詩諫楚王  
戊曰肅肅我祖國自豕韋彤弓斯征撫寧遐荒總齊  
羣邦以翼大商逸彼大彭勳績維光  
當即謂彭伯韋伯同伐班方時事也

### 九年陟

按商彝器有足跡畧薛尚功曰此器在洹水  
之濱賈甲墓旁得之銘作亞形中有左足跡是

河亶甲之  
陟葬此也

祖乙

按殷本紀河亶甲崩帝祖乙立商桑扈有  
祖乙尙薛用敬曰祖乙者河亶甲之子也

名滕

元年己巳王即位自相遷于耿

按閔元年傳晉滅耿杜  
注平陽皮氏縣東南有耿

鄉水經注汾水西遷耿鄉城北書叙曰盤庚遷于耿  
也尚書祖乙遷耿鄭注云盤庚遷耿誤也通鑑注耿

古耿國在蒲州城  
東北今河津縣是

命彭伯韋伯

按韋昭曰二國相繼為商伯今據竹書  
祖乙元年命彭伯韋伯則是同時為二伯

如周名之  
分陝也



二年圮于耿自耿遷于庇

箋按書叙曰祖乙圮于耿作祖乙孔疏曰祖乙居耿今為

水所毀更遷他處故言毀于耿耳又尚書盤庚云不常厥邑于今五遷及其數之惟有毫囂相耿四處而

己史記祖乙遷于邢皇極經世祖乙圮于耿徙居邢今据竹書祖乙又自耿遷庇則是盤庚前五遷祖乙

自兩遷也邢與庇當是一地帝王世紀紂自朝歌北築沙立臺沙丘在鉅鹿東北七十里括地志在邢州

平鄉東北二十里則史記謂祖乙遷邢者當即為竹書所云遷庇者也蓋是時未有邢國邢自周公子靖

淵始封高時謂之庇也

三年命卿士巫賢

箋按書君奭篇周公曰在祖乙時則有若巫賢孔傳曰賢巫咸子巫氏殷

本紀云帝祖乙時殷復興  
巫咸任職咸誤當作賢

八年城庇

箋按祖乙時數被河患遷庇八年始城之書疏曰鄭玄云祖乙居耿後奢侈踰禮土地迫

近山川嘗圯焉今据竹書祖乙二年便自耿遷庇八年城庇當是居庇後奢侈踰禮時汲冢古文未出故

鄭亦不知也

十五年命邠侯高圉

箋按世紀曰周后稷始封邠今扶風糜是也及公劉徙邕于豳詩稱

于豳斯館今新平漆之東有豳亭是也郡縣志古豳城在邠州三水縣西三十里公劉始都之處地理志

右扶風枸邑有豳鄉詩豳國公劉所都枸邑故城在三水縣東北二十五里周本紀不密失官而弄戎狄

之間卒于鞠立卒于公劉立公劉復修后稷之業自漆沮度渭故詩人歌之公劉卒于慶節立國于豳自

是而後歷皇僕差弗毀隄公非皆國于豳殷王祖乙錫高圉命為邠侯魯語展禽曰高圉太王能率稷者

也周人報馬韋昭曰高園后稷後十世公非之子也  
据漢書古今人表高園辟方子夷狄高園子則史記  
實多遺缺而韋注仍未考也又按鬻子曰湯得慶誦  
伊尹皇里且東門廬南門蠕西門疵北門側七大夫  
人表有慶節公劉子湯時人或曰即誦計后稷長于  
堯堯在位百年舜五十年夏自禹為天子至桀亡夏  
歷四百四十一年共五百九十一年而謂公劉為后  
稷曾孫止四五代可乎昔所謂周十五王不過如漢  
七制唐三宗之說而  
以為世數止此非矣

### 十九年陟

祖乙之世商道復興廟為中宗

附注曰史記與無逸皆無之。箋按周書

酒誥曰自成湯咸至于帝乙成王畏相多士曰自成湯至于帝乙罔不明德恤祀當即謂祖乙也

祖辛

箋按殷本紀祖乙崩于帝祖辛立商彛器有祖辛卣薛尚功曰祖辛沃甲之兄祖丁之父也

名旦

元年戊子王即位居庇

十四年陟

開甲

附注史記作沃甲○箋按殷本紀帝祖辛崩弟沃甲立世本作開甲與竹書同

名踰

元年壬寅王即位居庇

箋按祖乙二年庚午遷庇至開甲元年壬寅三十三年

五年陟

祖丁

箕按殷本紀帝祖沃甲崩立沃甲兄祖辛之子祖丁

名新

元年丁未王即位居庇

九年陟

南庚

箕按殷本紀帝祖丁崩立弟沃甲之子南庚

名更

元年丙辰王即位居庇

箕按祖乙二年遷庇至南庚二年共四十七年居庇自此以後

乃遷  
于奄

三年遷于奄

箋按南庚遷奄舊未有言奄地所在者郡國志魯國即奄國定四年傳祝鮀曰因商

奄之民命以伯禽其曰商奄者或以商嘗遷此故遂謂商奄乎

六年陟

陽甲

一名和甲。○箋按殷本紀帝南庚崩立弟祖丁之子陽甲

名和

元年壬戌王即位居奄

三年西征丹山戎

箋按山海經有始州之國有丹山郭璞注引竹書紀年曰和甲西征得一

山丹

四年陟

箋按史記帝陽甲之時殷衰自仲丁以來廢適而更立諸弟子弟子或爭相代立比九世亂于

是諸侯

莫朝

盤庚

箋按殷本紀帝陽甲崩弟盤庚立

名旬

元年丙寅王即位居奄

箋按經世紀年曰盤庚元以己亥自祖乙以乙未踐位歷祖乙沃甲

祖丁南庚陽甲而後及盤庚凡七世居耿已一百二十五年今據竹書祖乙元年己巳二年圮于耿自耿遷庇歷祖辛開甲祖丁皆居庇南庚三年自庇遷奄後陽甲及盤庚皆居奄盤庚十四年自奄遷殷經世紀年以為七世居耿若非也又盤庚之立元年丙寅南軒以為己亥非

七年應侯來朝

箋按地理志潁川父城縣應鄉故國周武王弟所封臣瓚曰汲郡古文殷時已

自有應謂此也杜預注左傳謂應國在襄陽城父縣胡身之曰襄陽無城父杜誤也括地志故應城在汝

州魯山縣東三十里

十四年自奄遷于北蒙曰殷

箋按書叙曰盤庚五遷將治亳殷民咨胥怨作盤庚

三篇鄭氏曰商家自此徙而改國號曰殷殷本紀曰盤庚之時殷已都河北盤庚渡河南復居成湯之故

居郡國志梁國蒙縣有北亳昭四年傅叔舉曰商湯有景亳之命括地志曰宋州北五十里大蒙城為景

亳湯所盟地因景山為名皇甫謐曰蒙為北亳即景亳商頌陟彼景山在曹縣東南四十里蔡氏書傳

以盤庚遷殷在于候師又以自祖乙都耿圮于河水盤庚欲遷于殷据竹書南庚三年自庇遷奄陽甲亦



居奄至是凡二十二年盤庚又自奄遷于北蒙則非自耿并非偃師矣其他又有譌北蒙為北冢譌北蒙為此遂者水經注洹水又東北逕鄴縣南洹水出洹山逕殷虛北竹書紀年盤庚即位自奄遷于此遂曰殷則是北譌為此蒙譌為遂也史記索隱曰汲郡古文盤庚自奄遷于北冢則殷虛去鄴三十里是殷虛南舊地號北冢則是蒙譌為冢也殊不審北蒙之亮在梁國蒙縣書叙曰盤庚將治亳殷鄴豈有亳之名乎種種謬誤殊屬可笑不有竹書烏從而證之

### 十五年營殷邑

莖按盤庚曰天其永我命于茲新邑即紀年所謂營殷邑也周希聖曰商人稱

殷自盤庚始据竹書夏后帝杼十三年高侯冥死于河帝芒三十三年高侯遷于殷帝泄十二年殷侯于亥宥于有易世本冥往河治水子亥遷殷是商之稱殷始自夏世殷土芒芒豈謂盤庚已後乎

十九年命邠侯亞圉

笺按世本曰亞圉雲都皇甫謐曰雲都亞圉字据漢書古今人表雲

都亞圉弟則實為二人非一人名與字也仁山金氏曰堯封棄于邠世為后稷以服事虞夏及夏之衰不窋失官自竄于戎翟之間不窋生鞠鞠生公劉始遷于豳荒史謂稷生釁璽釁璽生叔均釁即釁古邠字也自后稷至公劉十餘世世本自公劉歷慶節皇僕差弗毀踰公非辟方高圉侯牟亞圉雲都太公祖紺諸蓋十餘世史記以不窋為后稷子而又缺辟方侯牟雲都諸蓋四世遂謂后稷至文王為十五世且稷契同時受封契至湯四百餘年而十四世稷至文王十五世其亦誤矣据人表及此則以雲都為亞圉字者誤也

二十八年陟

小辛

箋按殷本紀帝盤庚崩弟小辛立殷復衰百姓思之迺作盤庚三篇索隱曰由不見古文故也

名預

元年甲午王即位居殷

三年陟

小乙

箋按殷本紀帝小乙崩弟小乙立

名斂


元年丁酉王即位居殷

六年命世子武丁居于河學于甘盤

箋按書說命王曰來汝說台小子舊

學甘盤既乃遷于荒野入宅于河無逸曰其在高宗  
舊勞于外爰暨小人楚語白公子張曰昔殷武丁能  
聳其德以入于河自河徂亳此蓋言武丁未即位時  
出居河上就學于甘盤既乃自河而往于亳殷為天  
子也韋昭謂武丁遷于河內從河內往亳都蓋非  
也當是時武丁尚為世子何得自遷於河內乎

# 十年陟



竹書統箋卷五

欽定四庫全書

史部

竹書統箋卷六  
七

詳校官編修臣范來宗

洗馬臣王坦修覆勘

總校官進士臣繆琪

校對官主簿臣汪日贊

謄錄監生臣王寶唐

欽定四庫全書

竹書統箋卷六

翰林院檢討徐文靖撰

武丁

箋按殷本紀帝小乙崩子帝武丁立

名昭

元年丁未王即位居殷命卿士甘盤

箋按書君奭篇周公曰在武丁時則

有若甘盤漢書古今人表有甘盤師古曰武丁師也

三年夢求傳說得之

箋按書叙曰高宗夢得說使百工營求諸野得諸傅巖作說命三篇

孔傳曰傅氏之巖在虞虢之界通道所經有澗水境道常使胥靡刑人築護此道說賢而隱代胥靡築之以供食王子年拾遺記曰傅說賃為賴衣者春於深巖以自給夢乘雲繞日而行筮得利建侯之卦歲餘以玉帛聘為阿衡括地志傅說版築之處在今陝州河北縣北七里即虞虢之界水經注沙澗水北虞山南經傅巖傅說隱室前俗名聖人窟或問高宗之于傅說文王之于太公知之熟矣恐民之未信也故假之夢卜以重其事程子曰然則是偽也聖人無偽

### 六年命卿士傅說視學養老

按墨子曰傅說被褐帶索庸築傅巖武丁得之舉

以為三公禮記明堂位曰韓宗殷學也王制曰凡養老殷人以食禮又曰殷人養國老于右學養庶老于左學又曰殷人編衣而養老文王世子曰大合樂必遂養老鄭氏注曰大合樂謂春入學舍菜合舞秋頒



學合聲於是時也天子則視學焉孔氏疏曰月令季春大合樂天子親往明天子亦親視學也又孔氏王制疏曰養老必在學者以學教孝弟之處故于中養老李氏曰養老之禮五十養于鄉六十養于國七十養于學虞夏殷周莫之改也然則視學養老皆七十以上之人故天子亦親往焉武丁以命傳說者書所謂夢帝賚予良弼其代予言者也

## 十二年報祀上甲微

箋按夏后帝泄十六年殷侯微以河伯之師伐有易殷道復興故殷

人報焉魯語展禽曰上甲微能帥契者也商人報焉韋昭曰上甲微契後八世湯之先也

## 二十五年王子孝已卒于野

箋按秦策陳軫曰孝已愛其親天下欲以為子尸子

曰殷高宗之子曰孝已有孝行事親一夜五起視衣之厚薄枕之高下也其母早死高宗感後妻言故之

而死又按家語曰曾參既出妻終身不娶其子元請  
焉曾子曰高宗以後妻殺孝己尹吉甫以後妻放伯  
奇吾上不及高宗中不比吉甫庸能免于非乎遂不娶

## 二十九年彤祭大廟有雉來

箋按書敘曰高宗祭成湯有飛雉升鼎耳而雉祖己

訓諸王作高宗彤日高宗之訓孔疏曰高宗之訓所以訓高宗也蔡仲默曰于彤日有雉雉之異蓋祭禩廟也序言祭湯廟者非是按二說皆謬蓋高宗武丁之廟號也若是書作于武丁未陟之前豈可云高宗之訓乎竹書殷武丁二十九年彤祭太廟有雉來五十九年陟廟號高宗祖庚元年即位居殷作高宗之訓殷本紀帝武丁崩于祖庚立祖己嘉武丁之以祥雉為德立其廟為高宗遂作高宗彤日及訓意是時祖庚繹祭于高宗之廟每過于豐故戒以無豐于昵因作高宗之訓以訓祖庚耳孔疏以為訓高宗謬矣

書序高宗祭成湯竹書武丁祭太廟並有證據而蔡  
傳云祭禰廟以序言祭湯廟非意以豐于昵昵為近  
廟則不得為湯廟也不審豐于昵者祖庚也祭湯廟  
者高宗也書曰惟先格王正厥事乃訓于王格王者  
至道之王高宗也訓于王者訓于祖庚也何轉以叙  
為非又按格王成帝建始元年詔作假王師古曰商  
宗彤日戡武丁之臣祖己之辭也假至也以祖己為  
高宗之臣時所作亦誤嗟乎竹書未出天下之以不  
狂為狂者  
將胡底也

### 三十二年伐鬼方次于荆

箋按後漢西羌傳武丁伐西  
戎鬼方詩大雅蕩云內糞于

中國覃及鬼方毛傳鬼方遠方也世本陸終娶于鬼  
方氏之妹曰女嬪注鬼方于漢則先零戎也要之武  
丁伐鬼方則鬼方自是國名不得以遠方槩之竹書  
言伐鬼方次于荆大抵即商頌所云奮伐荆楚者也

孔氏詩疏曰周有天下始封熊繹為楚于武丁之世不知楚君是何人今按彝器款式所載曾侯鐘銘曰惟王五十有六祀徙自西陽楚王勣章薛氏曰背有兩高字尚癸父丁彝銘曰惟王六祀兄癸卣銘曰惟王九祀商稱祀也商自太戊外惟高宗享國五十九年此鐘銘稱五十六祀者應自高宗伐鬼方之後而荆楚亦遠徙西陽也一統志西陽城在黃州府黃岡縣境

### 三十四年王師克鬼方

箋按易未濟九三高宗伐鬼方三年克之

### 氏羌來賓

箋按詩商頌殷武箋曰氏羌夷狄國在西方者也孔疏曰氏羌之種漢世仍存其居在秦

隴之西氏羌遠夷一世而一見于王前漢地理志隴西有氏道羌道後漢西南夷傳七羌九氏各有部落是漢世尚存也尚書大傳曰武丁內反諸己以思先王之道三年編髮重譯來朝者六國說苑曰三年之

後蠻夷重譯  
而朝者七國

四十三年王師滅夫彭

箋按鄭語史伯曰彭姓彭祖豕  
韋諸稽則商滅之矣韋昭曰彭

祖大  
彭也

五十年征豕韋克之

箋按鄭氏詩箋曰韋豕韋彭姓也  
計祖乙元年命彭伯韋伯至此歷

一百四十八年先後八年間而相繼漸  
滅韋昭謂後世失道商復興而滅之

五十九年陟

箋按周書無逸曰肆高宗之享國五十有  
九年石經曰高宗之享國百年漢杜欽曰

高宗享百  
年之壽

王殷之大仁也力行王道不敢荒寧嘉靖殷邦至于

小大無時或怨是時輿地東不過江黃

箋按郡國志汝南安陽有

江亭弋陽有黃亭

西不過氐羌南不過荆蠻北不過朔方而

頌聲作

箋按商頌詩序曰武祀高宗也

禮廢而復興廟號高宗

箋按

漢書嚴助傳高宗殷之盛天子也孔安國尚書傳曰德高可尊故號高宗

祖庚

箋按殷本紀帝武丁崩子帝祖庚立

名曜

元年丙午即位居殷作高宗之訓

箋按書叙祖己訓諸王作高宗之訓孔氏

傳曰所以訓也亡今据竹書祖己作高宗之訓在祖庚元年則高宗之崩已踰年矣孔疏以為訓高宗失其旨

矣又按商彝器有祖己爵薛尚功曰商之君有雍己無祖己据書叙祖己訓諸王作高宗之訓商器又有祖己甌疑即此祖己也

## 十一年陟

祖甲

附注曰國語作帝甲○按殷本紀帝祖庚崩弟祖甲立

## 名載

元年丁巳王即位居殷

按書無逸其在祖甲不義惟王舊為小人鄭氏曰祖甲武丁

子帝甲也有兄祖庚賢武丁欲廢兄立弟祖甲以此為不義逃于人間故云舊為小人金仁山曰祖庚崩而國人卒立之按高宗既廢孝己又欲廢祖庚大抵總惑于後妻之言

十二年征西戎

附注曰祖甲西征得一丹山。箋按竹書陽甲二年征丹山戎郭璞注山海經

亦引竹書曰陽甲西征得一丹山沈注以為祖甲蓋誤也

冬王返自西戎

箋按武丁之世其地西不過氐羌則祖甲西征當亦在隴西左右故即于是年

冬而返也

十三年西戎來賓

箋按殷太戊二十六年西戎來賓距祖甲十三年凡二百五十八年始因

祖甲親征而來賓想其負恃荒遠王師罕至正不獨夜郎自大已也

命邠侯組紺

箋按世本云太公組紺諸蓋三代世表稱叔類皇甫謐云公祖一名組紺諸蓋字叔

類號曰太公也今据竹書命邠侯組紺則組紺諸蓋非連名也金仁山以諸蓋別一人



二十四年重作湯刑

箴按昭六年傳叔向貽子產書曰夏有亂政而作禹刑商有亂政而

作湯刑周有亂政而作九刑杜注夏商之亂著禹湯之法周之衰亦為刑書謂之九刑文十八年傳太史克曰先君周公制周禮作誓命曰毀則為賊掩賊為藏竊賄為盜盜器為姦主藏之名賴姦之用為大凶德有常無舍在九刑不忘注曰誓命以下皆九刑之書九刑之書今亡按汲冢周書嘗參解曰太史筴刑書九篇以升授大正則九刑之名本此故史克以為周公作也叔向曰周有亂政而作九刑亦謂重作者耳

二十七年命王子囂王子良

箴按禮記王制注鄭氏曰王子王之庶子也西京雜

記曰霍將軍婁產二子疑所為兄弟或曰前生為兄後生為弟或曰居上者宜為兄居下者宜為弟時霍

光聞之答書曰昔殷王祖甲一產二子曰翼曰良以  
卵日生翼已日生長則以翼為兄以良為弟今霍氏

亦宜以前生為  
兄焉謂此也

三十三年陟

箋按書無逸曰肆祖甲之享國三十有三年

王舊在野及即位知小人之依能保惠庶民不侮鰥

寡迨其末也繁刑以攜遠殷道復衰

附注曰國語云  
王勤商十有

四世帝甲亂之七世而隕。箋按殷本紀帝甲淫亂  
殷道復衰與國語同据書無逸周公曰嗚呼自殷王

中宗及高宗及祖甲及我周文王茲四人迪哲則祖  
甲不當有淫亂之事矣大抵殷之祖甲猶周之宣王

周宣不再傳而有幽王之  
敗况祖甲後七世乎

馮辛

附注史記作康辛。○箋按殷本紀帝甲崩于帝康辛立索隱古今人表及帝王世紀皆作憑辛

名先

元年庚寅王即位居殷

箋按庚寅一本作庚申誤

四年陟

箋按書無逸自是厥後亦罔或克壽或五六年或四三年如沃甲五年南庚六年小辛三年仲

壬陽甲馮

辛皆四年

庚丁

箋按殷本紀帝康辛崩弟庚丁立

名囂

元年甲午王即位居殷

箋按紀年囂祖甲庶子祖甲二十七年命為王子者

八年陟

武乙

箒按殷本紀帝庚丁崩子武乙立

名瞿

箒按商有瞿父鼎薛用敏曰商器以父名多矣瞿則不知其為誰

元年壬寅王即位房殷

箒按武乙元年周文王昌始生而世紀以為當殷王祖甲二十

八祀庚寅生昌殊不審祖甲在位三十三年乃陟則是時文王六齡又歷馮辛四年庚丁八年武乙三十  
五年則是時文王五十三齡又歷文丁十三年帝乙九年則是時文王七十五齡又加紂四十年而文王  
堯則是時文王年百十六齡安得為九十七乎計文王之生適當武乙元年壬寅歲其年太王自邠而遷于岐周故孟子謂文王生于岐周也若祖甲二十八年未遷岐之前十九年安得云生于岐周乎

邠遷于岐周

箋按漢書匈奴傳戎狄攻太王亶父亶父亡走岐山下地理志右扶風美陽西北中

水鄉周太王所邑林氏曰邠在岐西北四百餘里括地志故周城一名美陽城雍州武功縣北七里郡縣

志岐山一名天柱山在鳳翔府岐山縣東北十里徐廣曰邑於周地故始改國曰周

三年自殷遷于河北

箋按殷本紀武乙立殷復去亳居河北相州圖經曰安陽在淇洹二

山之間本殷墟也史三代世表武乙徙河北

命周公亶父賜以岐邑

箋按詩疏引中侯攷起注云亶父以字為號今据竹書命亶父

則亶父是名也書傳說太王遷岐民束脩奔而從之者三千乘止而成三千戶之邑則是岐山之下始未有邑至是成邑而武乙因賜之也魯頌曰至于太王居岐之陽實始翦商毛傳曰翦齊也鄭箋曰翦斷也

說文作戩高戩福也三說皆非也爾雅釋詁曰勞來強事謂翦芟勤也實始翦商蓋謂實始勤商耳與周書太王其勤王家之意正自符含齊斷勤三訓皆見爾雅注詩者未之攷也

### 十五年自河北遷于沫

箋按武乙三年自殷遷河北至是復濟河北徙朝歌紂仍都之

蓋武乙之時其地名沫至紂時其地乃名朝歌水經注曰朝歌本沫邑紂有新聲靡樂號邑朝歌也周書酒誥王若曰明大命于妹邦孔傳曰妹地名紂所都朝歌以北是孔疏曰妹與沫一也詩有云沫之東矣沫之鄉矣括地志朝歌本沫邑武乙始都之是也

### 二十一年周公亶父薨

箋按自組紺呂上皆曰邠侯至亶父遷于岐周始命為公故曰

周公亶父也武乙元年文王生至是年二十一矣太王以文王生有聖德欲傳位季歷以及文王此也

二十四年周師伐程戰于畢克之

箋按穆王時左史戎夫記曰昔有畢程氏

損祿尊爵羣臣貌價比而戾民畢程氏以亡周師伐程戰于畢蓋即為畢程也地理志扶風安陵縣師古

曰闕駟以為周之程邑也書叙惟王季宅程史記正義引周書惟王季宅郢郢即程也郢故城在雍州咸

陽縣東二十里戰于畢畢陌在程西北莊十一年傳凡師得雋曰克

三十年周師伐義渠乃獲其君以歸

箋按左史戎夫記昔者義渠氏有兩

子異母皆重君疾大臣分黨而爭義渠以亡周師所伐者蓋即此也地理志北地有義渠道括地志寧原

慶三州本義渠戎國之地

三十四年周公季歷來朝王賜地三十里玉十穀馬十

疋

箋按莊十八年傳虢公晉侯朝王王享醴命之宥皆賜玉五鼓馬三疋非禮也王命諸侯名位不同禮亦

異數不以禮假人杜氏曰侯而與公同賜是借人禮雙玉為鼓又作珏今武乙賜季歷者乃公禮也王制曰有功德于民者則加地進律是也

三十五年周公季歷伐西落鬼戎

箋按後漢書西羌傳注武乙三十五年伐

西落鬼戎俘二十翟王

王畋于河渭大雷震死

箋按地理志渭水東至船司空入河因名為河渭也殷本紀曰

帝武乙無道為偶人謂之天神與之搏人為行天神不勝乃僂辱之為革囊盛血仰而射之命曰射天獵于河渭之間暴雷震死漢書郊祀志曰帝乙殺神而震死



文丁

附注曰史記作太丁非○箋按殷本紀武乙震死子帝太丁立

名托

元年丁丑王即位居殷

附注曰自沫歸殷邑○箋按帝乙十五年自河北遷于沫至文

丁又自沫歸殷邑史項羽本紀期洹水南殷虛上地理通釋曰殷虛南去朝歌城百四十六里是文丁自沫而北徙也

二年周公季歷伐燕京之戎敗績

箋按淮南子汾出燕京高誘曰燕京山在

太原汾陽縣水經注曰濕水逕陰館縣故城西又東北流左會桑乾水耆老云其水潛承太原汾陽北燕京山之天池燕京亦管涔之異名也郡縣志天池在嵐州靜樂縣北燕京山上週迴八里陽早不耗陰霖

不溢燕京之戎  
蓋居此山也

三年洹水一日三絕

箋按水經洹水出洹山逕殷虛北又東北逕鄴城南魏土地記曰鄴

城南四十里有安陽城有洹水東流者也皇甫謐曰鄴有上司馬殷太甲常居之太甲當即太丁之諱也

四年周公季歷伐余無之戎克之

箋按左傳閔二年晉申生伐東山臯落氏

上黨記東山在壺關縣城東南今名無臯成八年劉康公敗績于徐吾氏上黨記純留縣有余吾城在縣

西北三十里余無之戎當即余吾及無臯二戎也

命為牧師

箋按周禮大宗伯以九儀之命正邦國之位八命作牧鄭注曰謂侯伯有功德者加命得

專征伐于諸侯又按鄭注王制曰殷之州長曰伯虞夏及周皆曰牧今据天問曰伯昌號宸秉鞭作牧竹

書殷命季歷為牧師是殷亦稱牧也又按虞書益稷篇州十有二師釋文引鄭注曰師長也路史十國而有長長有師五長而一師師五十國州十有二師州有牧牧稟命于上京弼成五服至于五千

五年周作程邑

箋按武乙二十四年周師伐程至是十有七年而周始營之以作邑括地志安

陵故城在雍州咸陽縣東二十一里周之程邑也

七年周公季歷伐始呼之戎克之

箋按山海經有始州之國此云始呼未詳

也

十一年周公季歷伐翳徒之戎獲其三大夫來獻捷

按箋

後漢書西羌傳殷室中衰諸夷皆叛至于武丁征西戎鬼方三年乃克及武乙暴虐夫戎寇邊周公踰

梁山而避于歧下及于季歷遂伐西落鬼戎太丁之時周人復伐燕京之戎戎人大敗周師後二年周人復克余無之戎於是太丁命季歷為牧師自是之後更伐始呼霸徒之戎皆克之並據竹書為文也又按春秋提要曰獻者下奉上之詞軍獲曰捷莊三十一

年傳凡諸侯有四夷之功則獻于王王以警于夷中國則否

### 王殺季歷

箋按呂氏春秋首時篇王季困而死文王苦

勩勞國事以至薨沒故丈王哀思苦痛也時竹書未出誘不知有文丁殺季歷事也劉知幾史通雜說上曰竹書紀年出于晉代學者始知后啓殺益太甲誅伊尹文王殺季歷則與經典所載乖刺甚多季氏維禎曰羣書蕪穢典訓陵遲殺益誅尹猶曰頗刑季歷之弑古今大惡而以其之污穢至聖不憂若過鼻乎是

皆不知史記太丁即大丁誤以大丁為文王由不見  
竹書本文故也又按晉書求晉傳亦言文丁殺季歷  
**王嘉季歷之功賜之圭瓚秬鬯九命為伯**  
箋按大雅  
早麓詩傳

曰九命然後賜以圭瓚秬鬯周禮冬官玉人職裸圭  
尺有二寸有瓚以祀廟鄭氏曰裸謂始獻酌奠也瓚  
如盤其柄用圭有流前注禮記曰君賜圭瓚然後為  
鬯未賜者資鬯于天子說文曰秬黍也一稊二米所  
以釀鬯鬯鬱金香草也周禮大宗伯九命作伯注上  
公有功德者加命為二伯得征五侯九伯者孔叢子  
羊容問於子思曰周自后稷封為王者之後至太王  
王季文王此為諸侯矣奚得為西伯乎子思曰吾聞  
諸子夏曰殷王帝乙之時王季以九命作伯于西受  
圭瓚玉鬯之賜故文王因之得專征也据竹書則王  
季為西伯在帝  
乙之前三年  
**既而執諸塞庫季歷因而死故曰文**

丁殺季歷執王季于塞庫羈文王于玉門鬱尼之情

辭以作歌其傳久矣

箋按韓非子曰文王見罽于玉門正與此合庾信齊王憲碑因

箕子于塞庫羈文王于玉門以王季為箕子疑塞庫囚季歷處紂囚箕子于此所未詳也

十二年

周文王元年○箋按晉語胥臣曰文王之即位也詢于八虞咨于二虢度于閭天謀于南宮詒

于蔡原訪于辛尹

有鳳集于岐山

箋按周語內史過曰周之興也鶯鶯鳴于岐山草蟲經曰鳳雛為鶯鶯

十三年陟

帝乙

箋按殷本紀帝太丁崩子帝乙立

名美

元年庚寅王即位居殷

箋按帝王世紀曰帝乙復濟河北徙朝歌則自帝乙而後遂名

朝歌為殷矣

三年王命南仲西拘昆夷城朔方

箋按小雅出車云王命南仲往城于方邑

傳曰王殷王也南仲文王之屬方朔方近獫狁之國也繇云混夷銳矣鄭箋混夷狄國陸氏混音昆尚

書大傳四年伐大夷注即昆夷也汲冢周書序文王立西拒昆夷北備獫狁謀武以昭威懷作武稱朔方

漢武帝元朔二年開以為郡郡有渠搜縣王莽更郡曰溝搜即今之寧夏衛也

夏六月周地震

箋按鄭熱通志曰文王即位之八年六月寢疾五日而地震竹書則文王即位

之四  
年

九年陟

箋按文二年傳宋祖帝乙猶上祖也杜預曰帝乙微子父宋不以帝乙為不肖而猶尊尚之

帝辛

箋按殷本紀帝乙長子曰啓啓母賤不得嗣辛母為正后辛為嗣帝乙崩子辛立

名受

附注即紂也曰受辛○箋按周書克殷解尹逸笺曰殷末孫受德迷先成湯之明侮滅神祈不

祀孔晁注云紂字受德也又按呂氏春秋當務篇紂之同母三人長曰微子啓次曰仲衍三曰受德乃紂也

元年己亥王即位居殷

箋按國策吳起對魏武侯曰商紂之國左孟門右太行常山在

其北大河經其南史記正義曰竹書紀年云自龍庚徙殷二百五十二年更不徙都紂時稍大其邑南距



朝歌北據邯鄲及沙丘皆為離宮別館殊不審紂所居殷乃紂父帝乙所徙皇甫謐曰帝乙復濟河北徙

朝歌是也正義以此殷為盤庚所徙之亳殷謬矣

命九侯周侯邾侯

附注周侯為西伯昌○箋按戰國策魯仲連曰昔者鬼侯邾侯文王紂之

三公也鬼一作九徐廣曰鄆縣有九侯城春秋繁露曰紂刑九侯取其指環字皆作九廣又曰邾一作邾

今本紀年作邾侯蓋因廣誤史稱九侯進女子紂女不喜淫紂殺之而醜九侯邾侯爭之併殺邾侯韓子

曰文王說紂而紂囚之翼侯炙鬼侯腊比干剖心梅伯醜翼侯即邾侯也左傳隱五年曲沃伐翼翼侯奔

隨晉人納諸邾翼與邾近是韓子翼侯即邾侯也廣云一作邾非矣

三年有雀生鷓

箋按陸璣曰鷓似鷓青黃色燕頤句喙因風飛急擊鳩鷓燕雀食之家語孔子

曰昔殷王帝辛之世有雀生大鳥于城隅占之曰以小生大國家必王名必昌於是帝辛介雀之德不修國政殷國以亡注曰介助也以雀之德為助也

四年大蒐于黎

箋按揚土損穀梁疏曰言大者罷械過常春秋昭公十一年大蒐于比蒲二十

二年大蒐于昌間之類是也又按昭四年傳曰商紂為黎之蒐東夷叛之服虔曰黎東夷國名也子姓漢志魏郡黎丘縣晉灼曰黎山在其南韓非子曰紂為黎丘之蒐而戎狄叛之由無禮也

作炮烙之刑

箋按淮南俶真訓迨至殷紂燔生人辜諫者為炮烙鑄銅柱漢書莽作焚如之刑猶

是也

五年夏築南單之臺

箋按水經注南單之臺即鹿臺之別名也劉向新序曰鹿臺其大三

里高千尺臣瓚曰  
今在朝歌城中

雨土于亳

箋按墨子曰商紂不德十日  
雨土于亳天雨土君失封

六年西伯初禴于畢

箋按天保云禴祠烝嘗孔疏曰自  
殷以上則禴禘嘗烝王制文也至

周公則去夏禘之名以春禴當之更名春曰祠故禘  
禴云宗廟之祭春曰禴周公制禮乃改夏為禴今據  
竹書文王初禴于畢易未濟九五東鄰殺牛不如西  
鄰之禴祭木義曰當文王與紂之事則改夏祭為禴  
者自文王始矣杜佑通典曰畢王季初都之後畢公  
封焉汲冢古文曰畢西于豐三十里又按史記曰武  
王即位九年上祭于畢東觀兵于孟津亦即是畢也  
後漢蘇竟傳畢為天網主網羅無道之君故武王將  
伐紂上祭于畢求助天也若然則文王初  
禴于畢亦可謂禴祭于畢星乎知不然矣

九年王師伐有蘇獲姐已以歸

按晉語史蘇曰殷辛伐有蘇有蘇氏以姐已

女馬姐已有寵于是乎與膠鬲比而亡殷唐書世系表曰鄴西蘇城是又按秦誓曰作奇技淫巧以悅婦人蔡氏引列女傳曰紂膏銅柱下加炭今有罪者行輒墮炭中姐已乃笑皇甫謐謂紂二年納姐已皆誤也今據竹書紂四年作炮烙九年獲姐已則炮烙非為姐已設也世紀謂武王伐紂紂自焚于宣室而死二屢妾與姐已亦自殺抑猶為賢于褒姒故特為考其事而原之

作瓊室立玉門

按說文曰瓊赤玉也六韜曰紂作瓊室鹿臺飾以美玉通鑑外紀曰紂為瓊

室立玉門其大三里高千尺七年乃成韓非子曰文王見詈于玉門而顏色不變周策希寫曰昔者文王拘于羑里而武王羈于玉門似當以韓子為是又按賈子曰紂死棄玉門之外觀者皆進蹴之

十年夏六月王畋于西郊

箋按詩譜曰邶鄘衛者紂畿內方千里之地其封域在冀

州太行洹山之東孔疏曰河內即紂都而西不踰太行者以其國近西也戰國策曰紂聚衆百萬右飲洹

水不流則紂畋西郊蓋在太行洹水之東矣

十七年西伯伐翟

箋按王符潛夫論白狄媯姓地理通釋曰翟隗姓白狄有延安府鄜丹綏

廓銀石州之地漢匈奴傳西河固洛之間有赤翟白翟師古曰春秋所書晉師滅赤狄潞氏卻缺獲白狄

子者西伯伐翟殆卽此與

冬王遊于淇

箋按山海經沮洳之山淇水出焉南流注于河郡縣志出衛州共城縣西北沮洳山

至衛縣入河謂之淇水衛古朝歌也水經注淇水逕朝歌北又屈逕頓丘西太和泉水入焉水有二源一

水出朝歌城西北東南流老人晨將渡水而沉吟難濟  
紂問其故左右曰老者龍不實故晨寒也紂乃于此

斲脛而視髓也秦誓斲  
朝涉之脛蓋謂此也

二十一年春正月諸侯朝周按文王即位之三十  
二年諸侯始朝周也

伯夷叔齊自孤竹歸于周按史伯夷列傳伯夷叔齊  
孤竹君之二子也索隱曰韓

詩外傳云孤竹君是殷湯三月丙寅日所封相傳至  
夷齊之父名初字子朝伯夷名允字公信叔齊名致

字公達應劭曰孤竹之國君姓墨胎氏据殷本紀史  
公曰契後分封以國為姓有目夷氏即此也地理志

遼西令氏有孤竹城括地志孤竹  
古城在平州盧龍縣南十二里

二十二年冬大蒐于渭按昭十一年公羊傳大蒐者何  
簡車徒也地理志隴西首陽縣禹

貢鳥鼠同穴山在西南渭水所出東至船司空入河  
過郡四行千八百七十里此言大蒐于渭者隨渭水  
所經之地蒐之不止于一處也若扶  
風渭城之名起于漢武古未有也

## 二十三年囚西伯于羗里

按趙策魯連子曰紂醜鬼  
侯脯鄂侯文王聞之喟然而

嘆故拘之于羗里之庫又淮南道應訓崇侯虎曰周  
伯昌行仁義而善謀若與之從則不堪其殃縱而赦  
之身必危亡及未成請圖之屈商乃拘文王于羗里  
高誘曰屈商紂臣也皇甫謐云紂二十年囚文王少  
三年也又按地理志河內蕩陰縣西山羗水所出至  
內黃入蕩有羗里城西伯所拘也水經注曰昔紂王  
納崇侯虎之言囚西伯于此散宜生南宮括見文王  
乃演易用明否泰始終之義焉漢書曰文王重易六  
爻作上下篇陸佃理雅曰伏羲重卦重三畫于前文  
王重卦重六爻于後何用知伏羲重三畫于前以書

曰卜五占用二曰貞曰悔周官曰太卜掌三易之法其經卦皆八其別皆六十有四知之也故曰八卦成列象在其中矣因而重之爻在其中矣何用知文王重六爻于後以司馬遷曰伏羲至純厚作易八卦蓋西伯拘而演易揚雄曰易始八卦而文王六十四故曰易之興也其當殷之末世周之盛德邪當文王與紂之事邪據周易正義曰伏羲重卦周公作爻辭則伏羲重卦但己有爻無辭耳

### 二十九年釋西伯

箋按襄三十一年傳衛北宮文子曰紂囚文王七年諸侯皆從之囚紂于

是乎懼而歸之此言為得其寔殷本紀紂囚西伯西伯之臣閔天之徒求美女奇物善馬以獻紂紂乃赦

西伯亦傳聞之辭也

### 諸侯逆西伯歸于程

箋按文丁五年周公季歷作程邑居之文王又居之周書程典解惟



三月既生魄，文王合六州之侯，奉勤于商。高王用宗，讒震怒，無疆諸侯不娛，迎諸程文王，弗忍，乃作程典。

以命  
三忠

三十年春三月，西伯率諸侯入貢。

箋按左傳襄四年，韓獻子言于朝曰：文王

帥殷之叛國，以事紂，惟知時也。

三十一年，西伯治兵于畢。

箋按括地志：畢原在萬年縣西南二十八里。王氏曰：畢原

無山川陂湖，井深五十丈，秦謂之池陽原。漢謂之長平坂。其地南北數十里，東西二三百里。西伯治兵于

此習戰也。

得呂尚以為師。

箋按六韜曰：文王卜田，史編為卜田于渭之陽，將大得焉。非熊、非羆、非罴、非虎、非狼。

兆得公侯天遺汝師王乃齋戒三日田于渭之陽卒見呂尚坐茅以漁一統志呂城在南陽府城西三十里虞夏時封呂尚先祖於此齊太公世家曰呂尚者東海上人先祖嘗為四嶽佐禹平水土甚有功德夏之際封于呂尚其後苗裔也本姓姜氏從其封姓故曰呂尚蓋嘗窮困年老矣以釣魚奸西伯西伯出獵遇太公于渭之陽與語大說載與俱歸為文武師詩維師尚父劉向別錄曰師之尚之父之故曰師尚父

### 三十二年五星聚于房

按春秋元命包曰殷紂之時五星聚于房房者蒼龍之精周

據而興隋天文志曰周王之興五星聚房赤雀銜書止于王居

### 有赤鳥集于周社

按墨子曰赤鳥銜珪降周之岐社曰命周文王伐殷呂氏春秋曰文王

之時天光見火有赤鳥銜書集于周社文王曰火氣勝故其色尚赤傳玄晉鏡歌曲赤鳥銜書至天命瑞

周文

密人侵阮

箋按大雅皇矣曰密人不共敢距大邦侵阮  
祖共毛傳曰國有密須氏侵阮遂往侵共應

劬曰密須姑姓之國臣瓚曰安定陰密縣是左傳桓  
十年虞公出奔共池張氏曰今涇州有共池黃帝使  
伶倫之阮隃之陰取嶻谷之竹又按阮無所攷据漢  
成帝陽朔元年詔闕東大水流民欲入函谷天井壺  
口五阮闕者勿苛留陸友仁研北雜志梁四  
公子有仇膺五阮人或即是阮之故地也

西伯帥師伐密

箋按大雅皇矣云王赫斯怒爰整其旅  
以邁祖旅是其事也皇甫謐曰文王問

太公吾用兵孰可太公曰密須氏疑于我我可先伐  
之遂侵阮祖共而伐密須密須之伐書傳以為在文  
王受命之四年今据竹書是在  
殷未錫命文王之前一年也

三十三年密人降于周師

箋按周書大開武解曰維王一祀王在鄴密命訪于周公

且曰嗚呼余夙夜維商密不顯誰和若歲之有秋今予不獲其落若何孔晁注密人及商紂謀周大命不得其落恐將亡皇甫謐曰密須人自縛其君而歸文王昭十五年傳密須之鼓與其大路文所以大蒐也杜注密須姑姓國也在安定陰密縣東故密城是也又周書言一祀三月者是年為文王受命得專征伐之年故周書稱為一祀如所謂文王受命九年大統未集皆以是年為始一祀者時從殷稱祀也

遂遷于程

箋按孔氏詩疏曰周書稱文王在程作程寤程典今周書程寤解闕据大開武解周公旦

對武王曰茲順天降寤于程程降因于商商今生葛葛右有周孔晁注曰言天寤周以和高謀商朝生葛是祐助周也程寤解雖亡其義畧見于此矣

王錫命西伯得專征伐

箋按韓非子曰文王伐孟克莒舉鄆三舉事而紂惡之文王乃

懼請入洛西之地赤壤千里以請解炮烙之刑天下皆說史記殷本紀曰西伯獻洛西之地以請除炮烙之刑紂許之賜弓矢斧鉞得專征伐為西伯徐堅曰周禮雍州其川洛汭洛一名漆沮出馮翊此關輔之洛非河南洛也

約按文王受命九年大統未集蓋得專征伐受命自

此年始

箋按大雅文王篇序曰文王受命作周也鄭箋曰受命受天命而王天下制作周邦孔疏

引無逸曰文王受命惟中身厥享國五十年注云受命謂受殷王嗣立之命彼謂文王為諸侯受天子命也此述文王為天子故曰受天命也漢和帝時應劭著風俗通曰論語文王率殷之叛國以服事殷時尚

臣殷何緣便得列三王哉俗儒新生不能採綜多共  
辨論至于訟鬪太王王季皆見追號豈可復謂己王  
乎今据竹書殷錫西伯命得專征伐沈休文附注以  
受命為受得專征伐之命較應氏更為明快真可以  
破千古之疑矣

### 三十四年周師取耆及邾遂伐崇

箕按殷本紀西伯伐  
飢國滅之徐廣曰飢

一作肌又作耆是耆即饑國也左傳魯定公四年祝  
鮑曰分康叔以殷民七族有饑氏是也周本紀謂西  
伯敗耆國正義曰即黎國也然尚書西伯伐黎乃武  
王襲封西伯後三年事也安在文王所伐之耆即黎  
乎又按地理志河內壁王縣孟康曰故邾國今邾亭  
是也又大戴記曰紂不說諸侯之聽于周昌別嬖于  
死乃退伐崇許魏以客事天子注許魏不在五伐蓋  
時小伐也客事者謂忍而臣之也尚書大傳曰文王

既受命專征一年斷虞芮之質二年伐邾三年伐密  
須四年伐犬夷五年伐者六年伐崇今據竹書取者  
伐邾遂伐崇皆一年事也明堂位曰崇鼎  
天子之器也鄭注曰文王伐崇遷其重器

崇人降

箋按僖十九年傳子魚謂宋襄公曰文王聞崇  
德亂而伐之軍三旬而不降退修教而復之因

壘而降又襄三十一年傳北宮文子言  
于衛侯曰文王伐崇再駕而降為臣

冬十二月昆夷侵周

箋按帝王世紀曰文王受命四年  
春正月丙子朔昆夷氏侵周一日

三至周  
之東門

三十五年周大饑

箋按周書大匡解維周王宅程三年  
遭天之大荒作大匡以詔牧其方三

州之侯咸率謂此也又文傳解丈王召太子發曰天  
有四殃水旱饑荒其至無時非務積聚何以備之夏

箴曰小人無兼年之食遇天饑臣妾與馬非其有也大夫無兼年之食遇天饑臣妾與馬非其有也戒之哉弗思弗行至無日矣蓋亦有鑒于此也春秋襄公二十有四年大饑救梁傳曰五穀不升為大饑

西伯自程遷于豐

箴按僖十九年左氏傳寤莊子曰昔周饑克殷而年豐蓋謂此也孔晁曰

程地名在岐州左右初王季之子文王因焉而遭饑乃徙豐馬師古曰文王作豐今長安西北界靈臺豐水上

三十六年春正月諸侯朝于周遂伐昆夷

箴按漢書匈奴傳周西伯

昌伐吠夷師古曰即吠戎也又曰昆夷

西伯使世子發營鎬

箴按周書文傳解文王受命九年惟暮春在鎬名太子發曰吾語汝



所保所守初學記引周書曰文王在部名太子發曰  
吾括柱而茅茨為人愛費是鎬為文王時所營也其  
後武王徙都之文王有聲曰  
考卜維王宅是鎬京是也

### 三十七年周作辟雍

箋按莊子曰古之禮樂黃帝有咸池堯有大章舜有大韶禹有大夏

湯有大濩文王有辟雍之樂武王周公作武是辟雍  
為樂名也說文曰辟墻也廡天子享宴辟廡也魯詩  
解辟雍文王宮名古鼎銘惟三月初吉王在和宮大  
夫始錫作彝又王在辟宮獻工錫章是辟雍為宮名  
也或文王當日作樂于辟雍之宮奏之故樂亦名為  
辟雍也周有天下欲廣文王周公之制于天下故國  
學謂之辟雍鄉學謂之泮宮禮記王制曰天子命之  
教然後為學小學在公宮之左大學在郊天子曰辟  
雍諸侯曰泮宮史記曰國中立四代之學辟雍居中  
北虞學東夏學西殷學是為大學又建虞庠于西郊

夏序于州啟序于黨是為小學大雅云於論鼓鐘於樂辟雍毛傳云水旋丘如壁曰辟雍以節觀者大戴禮威德篇明堂者凡九室室四戶八牖以茅蓋屋上圓下方所以朝諸侯外水曰辟雍封禪書天子辟池索隱曰即周天子辟雍之池漢平帝紀安漢公奏立明堂辟廡應劭曰黃帝曰合宮有虞曰總章殷曰陽館周曰明堂辟廡者象璧園雍之以水象教化流行

三十九年大夫辛甲出奔周

箋按劉向別錄曰辛甲事紂七十五諫而不聽去之

周文王以為公卿襄四年傳魏莊子曰辛甲之為周太史也命百官官箴王闕漢書藝文志辛甲二十九篇地理志上黨長子縣周史辛甲所封

四十年周作靈臺

箋按詩含神霧曰文王作邑于豐起靈臺淮南子道應訓曰紂拘文王文

王歸乃為玉門築靈臺紂聞之曰周伯昌改道易行  
吾無憂矣詩序曰靈臺民始附也孔疏曰始附謂心  
附之也据中候雒師謀曰惟王既誅崇侯虎王在豐  
豐人一朝扶老至者八十萬戶又宋書索虜傳曰昔  
周道方隆靈臺初構民之附化八十萬家是詩序云  
始附者謂歸附之衆於是而始若以為心附民之心  
附文王者豈始于是日乎左傳僖公十五年秦伯獲  
晉侯以歸乃舍諸靈臺杜氏曰在京兆杜縣周之故  
臺也

王使膠鬲求玉于周

箋按王嘉拾遺記帝堯在位聖德  
光洽河洛之濱得玉版方尺圖天

地之形韓非子曰周有玉版紂令膠鬲索之文王不  
予費仲來求因予之是膠鬲賢費仲無道也周惡賢  
者之得志也  
故予費仲

四十一年春三月西伯昌薨

附注周文王葬畢畢西于豐三十里。○箋按漢書劉

向傳文武周公葬于畢臣瓚曰汲郡古文畢西于豐三十里師古非之曰畢陌在長安西北四十里也禮文王世子文王九十七而終尚書無逸文王受命惟中身厥享國五十年孔傳曰文王即位年四十七言中身舉全數今据竹書文王生武乙元年庚寅以文丁十二年戊子嗣父即位年四十六故曰受命惟中身又按通典曰文王葬畢初王季都之後畢公高封焉後漢蘇竟傳武王上祭于畢注以為古無墓祭此蓋上祭于畢星若然文王初禴于畢亦可謂上禴于畢星乎知不然矣又成湯自帝癸十五年始為諸侯十八年而代夏有天下至帝辛四十二年而文王卒共計五百零二年故孟子云由湯至文王五百有餘歲通鑑前編謂始湯終紂共六百六十年與孟子殊外當依竹書為是

四十二年

箒按周武王元年

西伯發受丹書于呂尚

箒按大戴禮踐阼篇曰武王踐阼三月召師尚父而問焉黃帝

顓頊之道存乎師尚父曰在丹書王欲聞之則齋矣三日王端冕師尚父亦端冕奉書而入而道丹書之言曰敬勝怠者吉怠勝敬者滅義勝欲者從欲勝義者凶云云王聞書之言惕若恐懼退而為戒書于席

四端以戒後世子孫

有女子化為丈夫

箒按春秋潛潭巴曰賢人去位天子獨居則女子化為丈夫

四十三年春大閱

箒按周禮大司馬中冬教大閱司馬掌九旗之物名及國之大閱贊司馬

頌旗物鄭注曰大閱王乘戎路及太常焉然則大閱乃冬時教戰之禮此云春大閱未必即踐禮也見紂

之大閱為  
不時耳

嶢山崩

箋按淮南傲真訓逮至殷紂嶢山崩三川涸覽冥訓嶢山崩而薄落之水涸史留侯世家沛公

欲以兵二萬人擊秦嶢下軍魏土地記藍田縣南有嶢關地名嶢柳方輿紀勝嶢關在藍田縣東南二十

八里一統志嶢山在藍田縣南二十里初學記引淮南子作嶢山

四十四年西伯發伐黎

箋按書叙曰殷始咎周周人乘黎祖伊恐奔告于紂作西伯戡

黎孔傳黎近王圻之諸侯在上黨東北鄭氏曰西伯文王也大全引朱子曰看來文王只是不伐紂耳其他事亦是都做了如伐崇戡黎之類或問西伯戡黎惟陳少南呂伯恭薛季隆以為武王吳才老亦言戡黎恐是伐紂時事然史記又謂文王伐崇伐密須伐耆國耆即黎也音相近二說未知孰是曰此等無證

據姑且闕之今據竹書殷帝辛三十四年周師取者  
四十一年西伯昌薨四十四年西伯發伐黎則是戡  
黎者武王無可疑也郡國志上黨壺關有黎亭古  
黎國劉昭注文王戡黎即此蓋又以鄭氏誤也

### 四十七年內史向摯出奔周

箋按帝王世紀曰紂政彌  
亂殷太史向摯載其圖書

而歸周又淮南子汜論訓太史令向摯先歸文  
王莽年而紂乃亡以摯為藝武王為文王皆誤

### 四十八年夷羊見

箋按周書度邑解王曰嗚呼且惟天  
不享于殷發之未生至于今六十年

夷羊在牧飛鴻遍野又周語內史過曰商之興也擣  
杙次于丕山其亡也夷羊在牧韋昭注夷羊神獸牧  
商郊牧野續博物志曰武王既勝殷登郟之阜以望  
商邑曰自發未生六十年麋鹿在牧飛鴻遍野徐廣  
引內史編之言曰夷羊在牧張華以為文王之詞曰  
水潦東流飛鴻滿野與竹書所紀微有不同但夷羊

不知何物史記貨殖傳其民獨疾不均徐廣疾音兕一音因凡反皆健羊名當即是夷羊也

二日並出

筭按荊州占曰兩日俱出以上是謂亂明明出天下大亂

五十一年冬十一月戊子周師渡盟津而還

筭按是年己丑周武

王即位之十年也唐天文志云武王十年夏正十月戊子周師始起則竹書稱十一月戊子蓋猶是高正也一統志孟縣在懷慶府城南六十里周武王會諸侯于孟津即此史記正義曰孟津在洛州河陽縣南門外孔氏書傳曰武王觀兵孟津以卜諸侯伐紂之心諸侯僉同乃退以示弱是渡盟津而還之事也王克論衡曰武王與八百諸侯咸同此盟故曰盟津又水經注曰河南有鉤陳壘世傳武王伐紂八百諸侯所會處河水至此有盟津之目



王囚箕子

箋按泰誓曰囚奴正士孔傳曰箕子止諫而以為囚奴世紀曰武王命召公釋箕子之囚

賜貝千朋又按書叙曰武王勝殷殺紂立武庚以箕子歸作洪範司馬彪注莊子曰箕子名胥餘漢官儀曰紂時胥餘為大師又按庾信周齊王憲神道碑囚箕子于塞庫據紀年附注塞庫紂祖丈丁囚季歷處紂囚以囚箕子耳

殺王子比干

箋按宋微子世家王子比干者亦紂之親戚也直言諫紂怒遂殺比干而剖視其

心水經注曰淇水逕頓丘縣故城西東北逕枉人山東隋地理志曰汲郡黎陽有枉人山圖經曰枉人山谷名也或曰紂殺比干于此因以為名世紀曰武王命閔天封比干之墓命宗祀享祀于軍寰宇記比干墓在汲縣十里世族譜殷比干子堅逃難長林山因以林氏唐書地理志江陵府有長林縣

# 微子出奔

箋按史記曰紂殺比干囚箕子太史疵少師

衛璧逢伯曰昔武王克商微子啓如是假令微子先  
抱祭器歸周周必禮之何至今日始持祭器而縛造  
于軍門如宋世家所云者據竹書商紂二十九年太  
史辛甲出奔周四十七年內史向舉奔周此獨書微  
子出奔不云奔周者知微子無抱祭器歸周之事而  
逢伯夸張其說以動楚子太史又據之而誤也觀武  
王克商即反商政釋箕子之囚封比干之墓立紂子  
武庚而不一及于微子以是時微子出亡未獲故也  
微子適周未知其何時迨武庚以叛誅而後封微子  
于宋則從前未嘗歸周可知一統志東昌府城東北  
有故微子城是微子在殷封于微漢志梁國睢陽縣  
故宋國微子所封是武庚既滅微子不忍殷王之不  
祀始受封于宋也蔡邕朱公叔鼎銘曰有殷之胄微  
子改以帝乙元子生公子朱其孫氏焉朱遜于荒野

始終未嘗適周故微子舍孫臚而立  
衍安有以微子之賢而先歸于周乎

# 五十二年庚寅周始伐殷

箋按是年庚寅周武王即位  
十一年矣周始伐殷蓋始果

于伐殷也書叙曰惟十有一年武王伐殷一月戊午  
師渡孟津作秦誓三篇書曰惟十有三年春大會于  
孟津陸氏釋文曰惟十有三年或作十有一年後人  
妄看序文輒改之今據竹書則書叙十有一年是也  
張子南軒曰書序稱十有一年而書復稱十有三年  
者字之誤也又唐志曰度議曰竹書十一年庚寅周  
始伐商先儒以文王受命九年而崩至十年武王觀  
兵盟津十三年復伐商推日月不為相距四年所說  
非是武王十年夏正十月戊子周師始起於歲差日  
在箕十度則析木津也晨初月在房四度房與歲星  
實相經緯后稷感之以生故國語曰月之所在辰馬  
農祥我祖后稷之所經緯也又三日得周正月庚寅

朔日月會南斗一度故曰辰在斗柄壬辰辰星夕見  
在南斗二十度其明日武王自宗周次于師所故武  
成曰維一月壬辰旁死魄翌日癸巳王朝步自周于  
征伐商是時辰星與周師俱進由建星之末歷牽牛  
須女涉顛頊之虛戊午師渡孟津而辰星伏于天龜  
所以告顛頊而終水行之運且木帝之所繇生也故  
國語曰星與日辰之位皆在北維顛頊之所建也帝  
侂受之我周氏出自天龜有建星及牽牛馬是歲歲  
星始及鶉火直軒轅之虛以爰稼穡稭稷星繫馬而成  
周之大萃也以此較之則書序稱惟十有一年實相  
符合而秦誓稱  
十有三年謫也

秋周師次于鮮原

按大雅皇矣篇云度其鮮原居岐之陽爾雅小山別大山曰鮮高平曰

原是也

冬十有二月周師有事于上帝

箋按王制天子將出征類于上帝禘于所征之

地秦誓曰予小子夙夜祇懼受命文考類于上帝是也

庸蜀羌髳微盧彭濮從周師伐殷

伐殷至邢丘更名邢丘曰懷○箋按孔氏

書傳曰八國皆蠻夷戎狄屬文王者國名羌在西蜀雙髳微在巴蜀盧彭在西北庸濮在江漢之南括地志云房州竹山縣及金州古庸國也益州及巴判等州皆古蜀國隴右岷洮叢等州以西羌也姚府以南古髳國之地戎府以南古微盧彭三國之地濮在楚西南左傳昭九年趙孟曰吳濮有蠻杜注建寧郡南有濮夷是也

湯滅夏以至于受二十九王用歲四百九十六年

附注起癸

亥終  
庚寅

竹書統箋卷六

欽定四庫全書

竹書統箋卷七

翰林院檢討徐文靖撰

周武王

名發

初高辛氏之世妃曰姜嫄助祭郊禩見大人迹履之  
當時歆如有人道感已遂有身而生男以為不祥

按箋

元命包曰姜嫄遊闕宮  
地扶桑履大人迹生稷棄之阨巷牛羊避而不踐又

送之山林之中會伐林者

箋按宋志者下有薦履之三字

又取而置

寒冰上大鳥以一翼藉履之姜嫄以為異乃收養焉

名之曰棄枝頤有異相長為堯稷官有功於民

箋按詩大

雅廢初生民時維姜嫄鄭箋曰姜姓者炎帝之後有女名嫄當堯之時為高辛氏之世妃禋祀上帝於高禋以祓除其無子之疾時則有大人之迹姜嫄履之故歆如有人道感已也於是遂有身後生子而名之

曰后稷之孫曰公劉有德諸侯皆以天子之禮待之

箋按大雅篤公劉鄭箋曰后稷之曾孫也吳越春秋曰堯拜棄為農師封之台號為后稷姓姬氏后稷卒于不窋立遭夏氏世衰失官奔戎狄之間其孫公劉避夏桀於戎狄變易風俗民化其政則公劉去不窋



凡四五百年矣周本紀以公劉為鞠之子不窋之孫止三代殊失考也初黃帝之世識

言曰西北為王期在甲子昌制命發行誅旦行道及

公劉之後十三世而生季歷季歷之十年飛龍盈於

牧之野此蓋聖人在下位將起之符也季歷之妃曰

大任夢長人感已滲于豕牢而生昌是為周文王

箋按

晉語曰大任震文王不變少溲於豕牢而得文王不加病焉龍顏虎肩身長十尺

胸有四乳箋按禮別名記曰文王四乳是謂至仁天下所歸百姓所親太王曰吾

世當有興者其在昌乎季歷之兄曰太伯知天命在

昌適越終身不返弟仲雍從之

按史記正義曰太伯居梅里在常州無

錫東南六十里

故季歷為嗣以及昌昌為西伯作邑于豐文

王之妃曰太姒夢商庭生棘太子發植梓樹于闕間

化為松柏棫柞以告文王文王幣率羣臣與發並拜

吉夢

按尚書中候曰文王廢伯邑考立發為太子又張華博物志曰太姒夢見商庭生棘乃小子

發取周庭梓樹樹之于闕間梓化為松柏棫柞覺驚以告文王文王曰慎勿言冬日之陽夏日之陰不召

而萬物自來及冢周書曰太姒夢周梓化為松

季秋之甲子赤雀銜書及豐置于昌戶

按置志作止

昌拜

稽首受之其文要曰姬昌蒼帝子亡殷者紂

箋按尚書中候

曰季秋赤雀銜丹書入豐止于昌戶昌拜稽首受最曰姬昌蒼帝子注曰最要者也

王將畋史

編卜之

箋按古今人表作史扁師古音編

曰將大獲非熊非羆天遣

太師以佐昌

箋按宋志作天道汝師

臣太祖史疇為禹卜畋得

臯陶其兆類此

箋按漢書律歷志三代既沒史官喪紀疇人子弟分散李奇曰疇人同類

之人俱明歷者如淳曰家業世世相承為疇師古曰如說是也今据周文王時史編曰臣太祖史疇為禹卜畋得臯陶其兆類此則是史疇之子孫世掌天官故以明歷者為疇人子弟也奇淳諸註皆非

王

至于磻溪之水

箋按一統志磻溪在鳳翔府寶鷄縣東南八十里磻溪谷中石壁深邃東

南隅有石室  
蓋太公所居

呂尚釣于涯王下趨拜曰望公七年乃

今見光景于斯尚立變名答曰望釣得玉璜其文要

曰岐受命昌來提撰爾維鈐報在齊

箋按呂氏春秋  
曰太公釣于茲

泉遇文王酈元曰碣溪中有泉謂之茲泉  
括地志茲泉源出岐州岐山縣西南几谷尚出游見

赤人自洛出授尚書命曰呂佐昌者子文王夢日月

著其身又鷺鷥鳴於岐山

箋按毛詩草蟲經曰雄曰  
雌曰鳳其雛為鷺鷥

孟春六旬五緯聚房後有鳳凰銜書游文王之都書

又曰殷帝無道虐亂天下星命已移不得復久

箋按  
琴操

作游文王之郊又  
星命一作皇命

靈祇遠離百神吹去五星聚房昭

理四海文王既沒太子發伐立是為武王武王駢齒

望羊

箋按禮別名記曰武王望羊是謂攝陽盱目陳兵天下富昌孔子世家眼如望羊王肅曰望羊

也視將伐紂至於孟津八百諸侯不期而會咸曰紂可

伐矣武王不從及紂殺比干囚箕子微子去之乃伐

紂度孟津中流白魚躍入王舟王俯取魚長三尺目

下有赤文成字言紂可伐王寫以世字魚文消燔魚

以告天有火自天止于王屋流為赤烏烏銜穀焉穀

者紀后稷之德火者燔魚以告天天火流下應以告

也

箋按史記索隱曰白魚躍入王舟中至火復王屋為烏皆見周書及今文泰誓

遂東伐紂

勝于牧野兵不血刃而天下歸之乃封呂尚于齊

箋按

洛誥傳曰天下諸侯采服來受命于周者一千七百七十三諸侯

周德既隆草木茂

盛蒿堪為宮室因名蒿室

箋按宋志作蒿宮又按晏子春秋曰明堂之制木工

之鏤示民知節也然或以蒿為柱表其儉質也范成大桂海虞衡志曰大蒿容悟道中久無霜雪處有大

者可作屋柱

既有天下遂都于鎬

箋按漢志武王治鎬師古曰今昆明池北鎬師

是

十二年辛卯王率西夷諸侯伐殷敗之于姆野

箋按書叙曰武

王戎車三百兩虎賁三千人與紂戰于牧野作牧誓  
武成曰既戊午師渡孟津癸亥陳于商郊甲子朝誓  
昧爽受率其旅若林會于牧野罔有敵于我師牧說  
文作姆云地名在朝歌南七十里博物志武王伐紂  
會于幾逢大雨焉蒙輿三百乘甲三千一日一夜行  
三百里以戰于牧野孔晁注曰牧野商郊紂出朝歌  
二十里而迎戰也戎車三百五十乘則士卒三  
萬六千三百五十人有虎賁三千五百人也

王親禽紂于南單之臺

箋按周書克殷解周車三百五十乘陳于牧野帝辛從武王使

高父與伯夫致師王既以虎賁戎車馳商師商師大  
敗商辛奔內登于康臺之上屏遮而自焚于火武王  
乃手太白以麾諸侯諸侯畢拜遂揖之武王先入適  
王所乃尅射之三發而後下車斬之以黃鉞折懸諸

太白來哲汲冢書抄曰周武王親禽紂於南單之臺水經注曰南單之臺即鹿臺之異名也

遂分天之明

箋按分天之明天尚未明也

立受子祿父是為武庚

箋按周書克殷解立王子武庚命管叔相作維解武王克殷乃

立王子祿父俾守商祀史記衛世家武王已克殷紂復以殷餘民封紂子武庚祿父比諸侯以奉其先祀勿絕白虎通曰春秋譏二名何所以譏者乃謂其無常若乍為名祿父元言武庚

夏四月王歸于豐饗于太廟

箋按書武成惟一月壬辰旁死魄越翼日癸巳王朝

步自周于征伐商厥四月哉生明王來自商至于豐丁未祀于周廟邦甸侯衛駿奔走執豆蓬孔傳曰此本說伐紂時一月周之正月月二日近死魄翼明也武王以正月三日行自周往伐商二十八日度孟津



其四月始生明月三日四月丁未祭告后稷以下文  
考文王以上七世之祖孔疏曰四月哉生明謂四月  
三日四月己丑朔其日當是辛卯也丁未祀于周廟  
四月十九日也禮記大傳曰牧之野武王之大事也  
既事而退柴于上帝祈于社設奠于牧室遂率天下  
諸侯執邊豆駿奔走追王太王賈父王季歷文王昌  
不以卑  
臨尊也

命監殷

箋按地理志周既滅殷分其畿內為三國詩風  
邶鄘衛是也邶以封紂子武庚鄘管尹之衛蔡

叔尹之以監殷民謂之三監鄭氏詩譜云分  
其地置三監使管叔蔡叔霍叔尹而教之

遂狩于管

箋按周書大匡解維十有三祀王在管管叔  
自作殷之監東隅之侯咸受賜于王王乃旅

之以上東隅又周書文政解維十有三祀王在管管  
蔡開宗循孔晁曰管管叔三邑二叔開其宗族循錫

京之政言從化也左傳宣十二年晉師救鄭楚次管以待之預曰京縣東北有管城

### 作大武樂

箋按周書大武解武有六制政攻侵伐搏戰善政不攻善攻不侵善侵不伐善伐不搏善

搏不戰孔晁曰言廟勝也尚書武成曰四月丁未祀于周廟越三日庚戌大告武成蔡仲默曰篇中有武成二字遂以名篇今据竹書武王十二年辛卯夏四月丁未祀于周廟作大武樂則是大告武成者謂大武之一成再成三成四成五成六成也申培詩說曰武為大武之一成賈為二成時邁為三成殷為四成酌為五成桓為六成則是大告武成者即告以大武之樂成也樂記天子語賓車賈曰夫武者象成者也武成名篇者此矣

### 十三年巢伯來賓

箋按書叙曰巢伯來朝芮伯作旅巢命孔疏曰仲虺之語云成湯放桀于

南巢或此是也徐邈曰巢偃  
姓之國今為縣屬廬州府

### 薦殷于太廟

按薦殷于廟者薦殷俘也說文曰俘取也周書世俘解維四月乙未武王成辟四

方通殷命有國惟一月丙辰旁生魄若翼日丁巳王  
乃步自于周征伐商王紂越若來二月既死魄越五  
日甲子朝至接于商則虔劉商王紂執夫惡臣百人  
太公望命禦方來丁卯望至告以馘俘戊辰王遂禦  
循自祀丈王時日王立政呂他命伐越戲方壬申荒  
新至告以馘俘侯來命伐靡集于陳辛巳至告以馘  
俘甲申百弁以虎賁誓命伐衛告以馘俘辛亥薦俘  
殷王鼎武王乃翼夫珪夫憲告天宗上帝王不革服  
格于廟王烈祖自太王太伯王季虞公文王邑考以  
列升維告殷罪癸酉薦殷俘王士百人籥人造王矢  
琰秉黃鉞執戈王奏庸大享一終王拜首稽首王定  
奏大享三終甲寅謁我殷于牧野王佩赤白旂籥人

奏武王入進萬獻明明三終乙卯籥人奏崇禹生開  
三鐘終王定庚子陳本命伐磨百韋命伐宣方新荒  
命伐蜀乙巳陳本命新荒蜀磨至告禽霍侯俘艾侯  
侯小臣四十有六禽禦八百有三百兩告以馘俘百  
韋至告以禽宣方禽禦三十兩告以馘俘百韋命伐  
厲告以馘俘武王遂征四方凡愍國九十有九凡服  
國六百五十有二時四月既旁生魄越六日庚戌武  
王朝至燎于周乃俾史佚繇書于天號孔晁注曰使  
史佚用書重  
薦俘于天也

### 遂大封諸侯

箋按周本紀武王追思先聖王乃褒封神農之後于焦黃帝之後于祝帝堯之後于

薊帝舜之後于陳大禹之後于杞於是封功臣謀士而師尚父為首封于營丘曰齊封弟周公旦于曲阜曰魯封召公奭于燕封弟叔鮮于管弟叔度于蔡餘各以次受封昭二十八年傳曰昔武王克商光有天

下其兄弟之國者十有五人姬姓之國者四十人林注曰之往也漢書賈山傳周蓋千八百國

秋大有年

箋按周頌曰綏萬邦屢豐年鄭箋曰誅無道安天下則亟有豐熟之年僖十九年傳甯莊

子曰昔周饑克殷而年豐蓋謂此也又按春秋桓三年冬有年公羊傳曰有年何以書以喜書也大大有年何以書亦以喜書也此其曰有年何僅有年也彼其曰大有年何大豐年也注曰宣十六年大有年

十四年王有疾周文公禱于壇墠作金滕

箋按書叙曰武王有疾周

公作金滕書曰既克商二年王有疾弗豫公乃為三壇同墠植璧秉珪乃告大王王季文王史乃祝冊曰維爾元孫某邁厲虐疾若爾三王是有丕子之責于天以旦代某之身孔傳曰壇築土墠除地蔡傳曰以其藏于金滕之匱編書者因以金滕名篇

十五年肅慎氏來賓

箋按國語曰仲尼在陳有隼集于陳侯之庭而死楛矢貫之石砮其

長尺有咫陳惠公使問仲尼仲尼曰隼之來遠矣此肅慎氏之貢矢也昔武王克商肅慎氏貢楛矢石砮其長尺有咫先王欲昭令德之致遠也銘其楛曰肅慎氏之貢矢以分元女太姬配胡公而封諸陳君若使有司求諸故府其可得也使求得諸金櫝如之又按博物志曰肅慎氏有樹名雒常若中國有聖人代立則其樹生皮可為衣周武王成王時曾遣使入貢地理通釋曰肅慎北夷在玄菟北三千餘里通典挹婁即古肅慎之國在不咸山北夫餘東北千餘里瀟大海勿吉在高麗北亦古肅慎國地靺鞨即勿吉也

初狩方岳誥于涿邑

箋按周頌詩序曰般巡狩而祀四嶽河海也孔疏曰武王既定天下

巡行諸侯所守之土祭祀四岳河海之神也又按書酒誥王若曰明大命于妹邦乃穆考文王肇國在西

土孔傳曰周公以成王命誥康叔据竹書武王初巡  
方岳遂誥于洙邑則此乃武王事也若成王之誥安  
得稱文王為穆考乎篇中稱文王者三而不及武王  
其當為武王之誥明矣况後世天子于宗邦諸侯尚  
有伯父叔父之稱而此直呼曰封曰汝何其于周公  
則謙而於周公之弟則倨也予嘗著管成頌記以康  
誥亦武王之辭時成王改封康叔于衛若果為成王  
之辭則當云衛誥何仍云康誥乎蓋成王在服將闋  
不便遽自作誥以命叔父故史記世家謂取康誥而  
申之是也酒誥為武王所作据竹書初巡方岳誥于  
洙邑在武王之十五年是也孔傳以為成王者疑非  
又按白虎通曰何以知太平乃巡狩以武王不巡狩  
至成王乃巡狩据周頌毛詩序曰般巡狩而祀四嶽  
河海也竹書武王十五年初狩方岳則是武王早已  
巡狩非成王始也詩鄘風洙之鄉矣毛傳曰洙衛邑  
正義曰酒誥注云洙邾國之都所處也邾都朝歌明

朝歌即  
沫也

冬遷九鼎于洛

箋按周書克殷解王乃命南宮百達史佚遷九鼎三巫孔晁注鼎王者所傳寶

三巫地名左傳桓二年臧哀伯曰武王克商遷九鼎于維邑義士猶或非之漢書地理志河南故郊鄆周武王遷九鼎水經注王城東南名為鼎門蓋九鼎所從入也故謂是地為鼎中是武王克殷之時鼎已為周所遷至是自三巫遷于維邑也

十六年箕子來賓

箋按汲冢周書王曰咨爾商王父師惟辛不悛天用假手于朕去故就新

辛錫朕以國闢洪範九疇錫侯以道朕殫厥邦土靡所私乃朝鮮于周底于遐逝其以屬父師史記宋世家箕子朝周過殷故墟城壇生黍箕子傷之乃作麥秀之詩曰麥秀漸漸兮黍油油兮彼狡童兮不與



我好兮狡童謂紂也是箕子封朝鮮來朝于周之事也孔氏書疏曰箕子既受周之封不得無臣禮故于十三祀來朝据尚書叙曰武王勝殷殺紂立武庚以箕子歸作洪範是勝殷為十二年則作洪範者亦是年也書曰惟十有三年王訪于箕子豈去年得箕子今年始問耶史記亦以為武王克殷後二年問箕子或然也宋世家既作洪範武王乃封箕子于朝鮮是矣但箕子來朝當以竹書十六年為得而孔疏云十三年為非蓋朝鮮去周幾近萬里安得十二年始在周作洪範後封朝鮮十三年即來朝之理乎竹書以為十六年是也後漢書東夷傳曰昔武王封箕子于朝鮮箕子教以禮義田蠶又制八條之教其人終不相盜無門戶之閉又按括地志高麗治平壤城本漢樂浪郡王險城即古朝鮮也鄭開陽朝鮮圖說井田在平壤府外城內箕子區畫井田遺蹟宛然孔安國洪範傳曰天與禹洛出書神龜負文而出列于背有

數至于九禹遂因而第之以成九類孔疏曰易繫辭云河出圖洛出書聖人則之九類各有文字即是書也班固五行志舉劉歆之說謂五行五事為洛書本夫自初一日五行至咸用六極悉龜背所有程泰之曰安國之所謂文者數著乎象而錯綜可觀焉耳劉歆謂洛書有字則全與孔異矣先儒立論非之曰如歆之說則洛書已有文字矣而所謂戴九履一左三右七二四為肩六八為足又何以故夫豈有兩洛書耶明王禕以圖書並出于伏羲之世皆聖人所則以作易洪範乃禹所自叙而非洛書今按莊子天運篇巫咸詔曰天有六極五常帝王順之則治逆之則凶九洛之事治成德備監照下土天下戴之此謂上皇呂吉甫注曰五常即五福嚮用五福威用六極順之則吉也反之則逆而凶九洛即洛書九疇九疇之用至于福極則治成德備天下戴之此所以為上皇据此天錫禹洛書禹因叙之以演疇與孔傳合若謂則

河圖洛書專指伏羲不得以兼禹將天垂象見吉凶亦止為伏羲設耶後儒非之正自不必又巫咸所云上皇舊無明注余按廣成子曰得吾道者上為皇疑即此上皇也

秋王師滅蒲姑

箋按昭九年傳景王使詹桓伯辭于晉曰及武王伐商蒲姑商奄吾東土也郡

國志下邳取慮縣有蒲姑陂書序成王東伐淮夷遂踐奄遷其君于蒲姑即此

十七年命王世子誦于東宮

箋按徐堅曰唐虞已上經傳無太子稱號至周始見

文王世子之制白虎通曰何以知天子之子稱世子春秋傳曰王世子會于首止是也又按周書武倣解維十有二祀四月王告夢丙辰出金枝邠寶開和細書命詔周公旦立後嗣屬小子誦文及寶典則成王立為世子至是已六年矣禮記文王世子曰成王幼不能涖作以為世子則無為也又周書本典解曰維

四月既生魄王在東宮召公告周公曰今朕不知明德所則政教所行宇民之道禮樂所生非不念而知故問伯父是成王在東宮之事也漢書五行志曰東宮太子所居宮也

冬十有二月王陟年九十四

箋按詩清廟疏武王以成王年十歲十二月崩今據

竹書武王九十四陟是年丙申以甲子計之則武王生于武乙二十二年之癸亥是時文王二十二歲生武王蓋武乙在位三十五年則武王十四歲加文丁十三年則武王二十七歲加帝乙九年帝辛五十二年則武王八十八歲加代高六年武王九十四歲歲在丙申舊說文王十五生武王而又有伯邑考為之兄此大謬也觀闕雖思得賢后以為之配求之不得輟轉反側若文王十二三時豈應作此語乎

成王

箋按周本紀武王崩太子誦代立是為成王

名誦

元年丁酉春正月王即位

箋按漢志曰成王元年正月已巳朔此命伯禽俾侯于魯

之歲也据竹書則此元年歲在丁酉也周書成開解成王元年大開告用周公曰王其敬天文命無易天不虞王拜曰式皇敬哉余小子思繼厥常以昭文祖定武考之列則成王初立已即天子之位周公攝政仍稱為王矣何嘗有負扆南面而攝天子之位哉

命冢宰周文公總百官

箋按周禮惟王建國設官分職乃立天官冢宰使率其屬而掌

邦治以佐王均邦國鄭注曰爾雅冢大也冢宰大宰也世紀曰成王元年周公為冢宰攝政八年春正月王始躬政事以周公為太師封伯禽于魯父子並命周公拜于前魯公拜于後與紀年漢志並乖世紀之

也誤

庚午周公誥諸侯于皇門

箋按庚午正月二日也周書曰周公會羣臣于闔門以輔

王之格言作皇門維正月庚午周公格左闔門會羣臣曰嗚呼下邑小國克有耆老據屏位建沈入非不用明刑惟其開告予于嘉德之說命我辟王小至于大孔晁注路寢左曰皇門闔音皇小至于大小大邦君也宣十一年傳楚克鄭入皇門至于遠路吳氏曰皇門周邑向京畿之道董道石鼓文辨曰轡之柔矣作洛皇門此周公作也詩書不得盡見其因後代亡之亦未可知也似未見汲冢周書皇門解也

夏六月葬武王于畢

箋按周書作維解乃歲十二月王崩于錫肆于岐為元年夏六月葬

武王于畢括地志武王墓在雍州萬年縣西南三十八里畢原上

秋王加元服

箋按家語曰成王年十有三而嗣立周公居冢宰攝政以治天下明年夏六月既葬

武王冠成王而朝于祖以見諸侯周公命祝雍作頌曰祝王辭違而已勿多也祝雍辭曰使王近于民遠于佞嗇于時惠于財親賢而任能其頌曰令月吉日王始加元服去王幼志服袞職欽若昊天六合是弋率爾祖考永永無極又按漢書昭帝紀元鳳四年春正月丁亥帝加元服如淳曰元服謂初冠加上服也師古曰如氏以為衣服之服非也元首也冠者首之所著故曰元服其下及黜傳序曰上正元服是知謂冠為元服儀禮圖解儀禮所存者唯士冠禮自士以上有大夫諸侯天子冠禮見於家語冠頌大戴公冠與禮記玉藻者雖遺文斷闕不全而大槩亦可考如趙文子冠則大夫禮也魯襄公邾隱公冠則諸侯禮也周成王冠則天子禮也大夫無冠禮古者五十而後爵何大夫冠禮之有其冠也則服士服行士禮而

已始冠緇布冠自諸侯下違諸侯始加緇布冠繡綾其服玄端再加皮弁三加玄冕大戴禮公冠四加玄冕鄭注曰四當為三是也天子始冠加玄冠朱組纓再加皮弁三加衮冕玉藻曰玄冠朱組纓天子之冠也三王共皮弁素幘疏曰以其質素故三王同之是三加衮冕冠頌曰去王幼志服衮職是也

武庚以殷叛

按地理志鄴以封受子武庚是武庚所居即殷都也成王時乃以殷叛

周文公出居于東

按書金縢曰武王既喪管叔及其羣弟乃流言于國曰公將不利于孺

子周公乃告二公曰我之弗辟我無以告我先王周公居東二年則罪人斯得孔傳曰辟法也陸德明曰馬鄭音避謂避居東都今括竹書成王元年武庚以殷叛周文公出居于東二年秋王逆周文公于鄆遂伐殷則是居東者謂出居于東也孔傳謂周公既告二公遂東征之非矣然馬鄭以居東為東都亦非史



記魯世家曰人或諧周公周公奔楚邵氏甯曰周公避流言嘗居東矣魯公封也不之魯而之楚乎据戰國策惠施曰昔王季歷葬于楚山之尾梁水蓄其墓季婦鼎銘曰王在成都王徙于楚麓左傳成十三年迨晉侯于新楚杜注新楚秦地括地志終南山一名楚山在雍州萬年縣南五十里武王墓在萬年縣西南三十里周公奔楚當是因流言出居依于王季武王之墓地必無遠涉東都之理邵疑為楚國謬矣觀下文王啟金滕執書以泣曰維朕小子其新逆王出郊天乃雨反風則居東為成周之近郊而必非東都矣明

二年奄人徐人及淮夷入于邺以叛

箋按左傳因商奄之民命以伯禽說

文云邾國在魯括地志兗州曲阜縣奄里即奄國之地左傳周有徐奄注二國嬴姓魯世家伯禽即位之

後有管蔡等反也淮  
夷徐戎亦並興反

秋大雷電以風王逆周文公于郊遂伐殷

箋按金縢曰王出郊天乃

雨反風孔傳曰郊以玉幣謝天今括竹書則郊是國之近郊而不得謂郊天之郊矣爾雅邑外謂之郊周禮杜子春注云五十里為近郊鄭氏云天子近郊五十里

三年王師滅殷殺武庚祿父

箋按周書作維解周公立相天子三叔及殷東徐奄

及熊盈以畧周公召公內弭父兄外撫諸侯元年夏六月葬武王于畢二年又作師旅臨衛政殷殷大震清降辟三叔王子祿父北奔管叔經而卒乃囚蔡叔于郭澹凡所征熊盈族十有七國俘維九邑俘殷獻民遷于九畢俾康叔守于殷俾中旄代管叔于東孔晁注曰康叔代霍叔中旄代管叔

遷殷民于衛

箋按書叙曰成王既伐管叔蔡叔以殷餘民封康叔作康誥酒誥梓材

遂伐奄

箋按定四年傳祝鮀曰因商奄之民命以伯禽而封于少昊之虛鄭氏曰奄國在淮夷之北孟

子三年伐奄討其君益成王嗣位之三年也

滅蒲姑

附注薄姑氏與四國作亂故周文公滅之○箋按此蒲姑當是薄姑之謠昭二十年傳晏子曰

昔爽鳩氏居此地季荊因之達伯陵因之蒲姑氏因之而後太公因之則是蒲姑之滅太公之封皆在于武王之世安得至成王時始滅蒲姑耶漢書地理志周成王時薄姑氏與四國作亂成王滅之師古漢昭帝紀注四國管蔡商奄也地理志琅瑯姑幕縣應劭曰薄姑氏之國後漢注姑幕故城在密州莒縣東北郡國志博昌縣有薄姑城屬樂安國取慮縣有蒲姑陂屬下邳國故曰此蒲姑蓋薄姑之訛也

四年春正月初朝于廟

箋按詩序曰閔予小子嗣王朝于廟也鄭箋曰嗣王者謂成王

也除武王之喪將始即政朝于廟也

夏四月初嘗麥

箋按周書敘成王即政因嘗麥而語羣臣求助作嘗麥周書嘗麥解曰維四年

孟夏王初祈禱于宗廟乃嘗麥于太祖是月也命大正正刑書太祝以王命作筮衆臣咸興受大正書乃降太史筮刑書九篇以升授大正大正生舉書乃中降再拜稽首王命太史正升拜于上王則進太史乃藏之于盟府以為歲典

王師伐淮夷遂入奄

箋按書叙曰成王東伐淮夷遂踐奄作成王政孔傳曰為平淮夷徙

奄之政今令亡

五年春正月王在奄遷其君子蒲姑

箋按書序曰成王既踐奄將遷其君

于蒲姑周公告召公作將蒲姑左傳昭十六年齊師至蒲隧杜注下邳取慮縣有蒲姑阪

夏五月王至自奄

箋按書叙曰成王歸自奄在宗周告庶邦作多方書曰惟五月丁亥王來

自奄至于宗周孔傳曰周公歸政之明年淮夷奄又叛魯征淮夷作費誓王親征奄滅其國五月遷至歸京按竹書夏五月王至自奄在公攝政之五年後二年公始復政于王孔傳云王至自奄在公歸政之明年疑誤

遷殷民于洛邑遂營成周

箋按周書作維解周公將致政乃作大邑成周于土中立

城方千七百二十丈邾方七十里南繫于洛水北因于邾山以為天下之大漑尚書多方曰昔朕來自奄

于大降爾四國民命乃明致天罰移爾遐逝又曰今朕作大邑于茲洛亦惟爾多士奔走臣我多遜是遷殷民在前作洛在後也蔡氏曰叙書者考之不詳以為成周既城遷殷頑民謬矣今據竹書云遷殷民于洛邑遂營成周是作洛在遷殷之後則蔡傳是也呂氏曰孔子序洛誥云周公往營成周則成周乃東都總名河南成周之王城也洛陽成周之下都也王城非天子時會諸侯則虛之下都則保釐大臣所居治事之地周人朝夕受之習見既久遂獨指以為成周矣

六年大蒐于岐陽

箋按昭四年傳椒舉言于楚子曰成有岐陽之蒐國語叔向曰昔成王盟

諸侯于岐陽楚為荆蠻致茅蕝表坐

七年周公復政于王

箋按周書明堂解夫維商紂暴虐脯鬼侯以享諸侯天下患之四海

兆民欣戴文武是以周公相武王以伐紂夷定天下  
既克紂六年而武王崩成王嗣幼弱未能踐天子之  
位周公攝政君天下彌亂六年而天下大治乃會方  
國諸侯于宗周大朝諸侯明堂之位制禮作樂頒度  
量而天下大服各致其方賄七年致政于成王漢書  
律歷志是歲十二月戊辰晦周公以反政故洛誥篇  
曰戊辰王在新邑烝祭歲命作策惟周公誕保文武  
受命惟七年又魯周公世家曰七年後遷政成王躬  
躬如畏然徐廣曰躬躬敬慎貌也蔡氏書傳曰先儒  
謂成王幼周公代王為辟至是反政成王故曰復子  
明辟夫有失然後有復武王崩成王立未嘗一日不  
居君位何復之有哉今括竹書云成王七年周公復  
政于王蓋七年前成王尚幼天下之政皆聽于冢  
宰至是復政于王今自親政耳豈曰我先為明辟至  
是復子明辟哉書義

自明傳書者誤耳

春二月王如豐

箋按書召詰曰惟二月既望越六日乙未王朝步自周則至于豐孔傳曰周公

攝政七年二月十五日日月相望于己望後六日二十一日成王朝行從鎬京則至于豐以遷都之事至文王廟告文王詩序曰清廟祀文王也周公既城洛邑朝諸侯率以祀文王焉

三月召康公如洛度邑

箋按召康公名爽燕世家曰召公爽與周同姓皇甫謐曰文王

之庶子毅梁傳曰燕之分子也漢扶風雍縣東南有召亭召康公邑焦氏筆乘曰史篇召公名醜爽豈其字耶書叙曰成王在豐欲宅洛邑命召公先相宅作召詰書曰惟太保先周公相宅越若來三月惟丙午耻越三日戊申太保朝至于洛卜宅即此也孔氏召詰傳曰是時周公居攝五年据竹書則召公如洛度邑乃在周公復政之明年為成王七年多二年也蓋書傳言四年建侯衛五年營成周建侯衛者尚書康



誥曰惟三月哉生魄周公初基作新大邑于東國洛四方之民大和會是也竹書成王五年王至自奄遷殷民于洛邑遂城成周者洛邑既成營成周為遷洛之計也至七年如洛度邑則度邑即召誥之卜宅詩所謂宅是錫京之宅周書度邑解稱武王曰瞻于伊洛無遠天室其曰茲日度邑是也于洛度邑本武王之意而成王周公成之以為東都命召公先相宅者此也孔傳以此為五年之事未見竹書故也

### 甲子周文公誥多士于成周

按書叙曰召公既相宅周公往營成周作洛誥成

周既成遷殷頑民公以王命誥作多士王氏曰篇名多士序以為頑民何在官者謂之士卿大夫士是也在民者謂之士士農工商是也此書稱士皆在官之殷士也

### 遂城東都

按昭三十二年傳昔成王合諸侯城成周以為東都崇文德焉詩王城譜曰王城者周

東都王城畿內方六百里之地正義曰車攻序云復會諸侯于東都謂王城也周以鎬京為西都故謂王城為東都即洛邑也

### 王如東都諸侯來朝

箋按尚書周官曰六年五服一朝又周書明堂解曰大朝諸侯明堂

之位天子負斧依南面立率公卿士侍于左右三公之位中階之前北面東上諸侯之位阼階之東西而北上諸伯之位西階之西東面北上諸子之位門內之東北面東上諸男之位門內之西北面東上九夷之國東門之外西面北上八蠻之國南門之外北而東上六戎之國西門之外東面南上五狄之國北門之外南面東上四塞九口之國世告至者應門之外北面東上宗周明堂之位也明堂者明諸侯之尊卑也故周公建焉而朝諸侯于明堂之位

冬王歸自東都

箋按書洛誥疏曰周公攝政七年三月經營洛邑既成洛邑又歸向西都詩王

風疏曰以洛邑為東都則此云歸自言自此而歸也

立高圉廟

箋按魯語展禽曰高圉太王能帥稷者也故周人報焉

八年春正月王初蒞阼親政

箋按文王世子曰成王幼不能蒞阼周公相踐阼而

治注曰武王崩成王方十歲雖蒞阼為天子未能行治天下之事故周公以冢宰攝政相治之黃東發曰踐阼亦指成王非指周公是成王久已踐阼至是始親政也

命魯侯禽父齊侯及遷庶殷于魯

箋按定四年傳子魚曰昔武王克商成王

定之選建明德以屏藩周分魯公以殷民六族條氏徐氏蕭氏索氏長勺氏尾勺氏使率其宗氏輯其分

族將其醜類以法則周公用即命于周是從前伯禽封魯已分以殷之六族至武庚既誅復遷庶殷于魯使醜類得有

所統率也

作象舞

箋按仲尼燕居曰而君相見升堂而樂闋下管象武注曰言象而兼言武者象蓋武舞之樂也

呂氏春秋曰成王立殷民反周公踐伐之商人服象為虐於東夷周公遂以師逐之至于江南乃為三象以嘉其德高誘曰三象周公所作樂名淮南子齊俗訓曰周人之禮其樂大武三象棘下是也詩序曰維清奏象舞也鄭箋曰象用兵時刺伐之舞武王制焉墨子三辯篇武王因先王之樂又自作象以象為武王所作時竹書未出故皆誤以為武王也

冬十月王師滅唐遷其民于杜

箋按襄二十四年傳范宣子曰昔句之祖在商

為豕韋氏在周為唐杜氏杜預曰唐杜二國名殷末豕韋國于唐周成王滅唐遷之于杜為杜伯今京兆杜縣徐才宗國都記曰周成王時唐人作亂成王滅之而封太叔遷唐人子孫于杜括地志故唐城在絳州翼城縣北三十里即堯裔子所封

九年春正月有事于太廟

箋按春秋宣八年夏六月辛巳有事于太廟杜預曰有事

祭也又昭十五年二月癸酉有事于武宮傳曰禘于武公則此有事于太廟亦是禘也

初用勺

箋按詩序曰酌告成大武也申培詩說曰酌為大武之五成孔疏曰酌左傳作勺內則曰十三

舞勺成童舞象繁露曰周公輔成王作勺樂以奉天勺與酌勺義一也

肅慎氏來朝王使榮伯錫肅慎氏命

箋按武王十五年肅慎氏來賓貢楛

矢石銘至是而又來朝書叙曰成王既伐東夷肅慎來賀王仰蒙伯作賄肅慎之命傳曰賄賂也義未詳篇七疏曰蒙國名周同姓諸侯為王卿士据穆傳太王亶父封其元子吳太伯于東吳賄用周室之璧郭注賄贈賄也則賄肅慎者義益如此不當以賄賂解之

十年王命唐叔虞為侯

箋按晉世家唐叔虞者周武王子成王弟字子于定四年傳子

魚曰分唐叔以大路密須之鼓闕鞏姑洗懷姓九宗職官五正命以康誥而封于夏虛杜預曰夏大夏今太原晉陽也

越裳氏來朝

箋按尚書大傳曰周成王時越裳氏重九譯而貢白雉韓詩外傳曰越裳氏重譯來

朝海不揚波三年矣意者中國有聖人守水經注曰交州外城記九德縣屬九真郡與日南接周越裳氏

之夷國中華古今注曰舊說云指南車周公所作也  
越裳氏重譯來朝使者迷其歸路周公錫以柝車五  
乘皆為司南之制使越裳氏載之以南緣扶南林邑  
海際期年而至其國使大夫竄將送至其國而還其  
始制車輅輜皆以鐵還至周鐵亦銷盡以屬中車  
氏攻而載之常為先道示服遠人而正四方也

周文公出居于豐

箋按三輔決錄注鎬在鄠水東  
鄠在鎬水西相去二十五里

十一年春正月王如豐

箋按通鑑綱目前編曰成王十  
有一年周公在豐作無逸以戒

王無逸曰君子所其無逸先知稼穡之艱難乃逸孔  
疏曰上言君子當無逸此言乃謀逸豫者君子之事  
勞心與形般于遊畷形之逸也無為而治心之逸也  
君子無形逸而有心逸既知稼穡之艱難可以謀心  
逸也是時公在豐而王亦  
如豐公因作無逸以戒之

唐叔獻嘉禾王命唐叔歸禾于周文公

按書叙曰唐叔得禾異畝同

穎獻諸天子王命唐叔歸周公于東周公既得命禾旅天子之命作嘉禾又按嘉禾書亡而張霸乃偽作嘉禾篇有周公奉覺立于阼階延登贊曰假王涖政王莽遂依之以稱居攝則偽書之惑世誣民者大矣

王命周平公治東都

按都疑作郊書叙周公既沒命君陳分正東郊成周作君陳鄭注

曰天子之國五十里為近郊今河南洛陽相去則然是近郊五十里之驗也据竹書周公之薨在成王二十一年時猶未薨叙說誤也周本紀太史公曰學者皆稱周伐紂居洛邑綜其實不然武王營之成王使召公卜居九鼎焉而周復都鄴鎬是成王雖作洛邑猶遷西周而東都之地則命周平公分正東郊是也陳氏曰治洛以化殷民為重故君陳畢命曰尹茲東郊保釐東郊雖以東郊言實全付以治洛也



約按周平公即君陳周公之子伯禽之弟

箋按鄭康成論語注

曰君陳周公子又按焦氏筆乘曰周書有君陳篇王伯厚以君陳為周公之子伯禽之弟見坊記注

十二年王師燕師城韓王錫韓侯命

箋按傳二十四年傳富辰曰邗晉應

韓武之穆也鄭語史伯對鄭桓公曰武王之子應韓不在其在晉乎則韓侯蓋武王之子成王之弟也史記韓世家乃曰韓之先與周同姓殊失考矣今据竹書成王命韓侯就國王師燕師城韓蓋是時韓侯之國與燕為近水經注聖水東逕方城縣又東南逕韓城東詩韓奕篇曰溇彼韓城燕師所完王錫韓侯其追其貊奄受北國鄭箋曰周封韓侯居韓城為韓伯言為獫狁所逼稍稍東遷也王肅曰今涿郡方城縣有韓侯城是也郡縣志方城故城在涿州固安縣南十七里然則宣王時韓侯封于韓原居梁山之地蓋

即此韓侯之裔孫也其詩曰王親命之緡戎祖考又曰以先祖受命因時百蠻皆指成王時韓侯言也溥彼韓城燕師所完非即紀年之所稱王師燕師城韓者哉此蓋追述其先祖之事欲其克紹前烈非宣王之世別有燕師城韓也

### 十三年王師會齊侯魯侯伐戎

箋按此當是東方之戎近齊魯者如春秋之世

公會戎于潛公及戎盟于唐公追戎于濟西北戎伐齊皆東方之戎故王師會齊魯以伐之

### 夏六月魯大禘于周公廟

箋按大禘于周公廟者蓋周公宣父周公季歷之廟也時

周文公後八年始禘故知非周文公之廟也禮明堂位曰魯君孟春祀帝于郊配以后稷季夏六月以禘禮祀于太廟是也

十四年秦師圍曲城克之

箋按成王時無秦秦當作齊又城當作成齊太公世家武

王封師尚父齊營丘萊人來伐與之爭營丘故至是齊師圍曲城而克之郡國志東萊有曲成蓋萊夷地也

冬洛邑告成

箋按周成王七年召康公如洛度邑至是凡八年而洛邑始告成

十八年春正月王如洛邑定鼎

箋按周本紀成王在豐使召公復營洛邑如武

王之意周公復卜申視卒營築居九鼎焉左傳宣三年王孫滿勞楚子曰成王定鼎于郊鄆杜注曰郊鄆今河南也武王遷之成王定之

鳳凰見

箋按周書王會解鳳凰戴仁抱義尚書周公留君奭篇曰喬造德不降我則鳴鳥不聞則前此

召公未求去時鳳凰固嘗至矣此云鳳凰見蓋以王如洛邑時見也故特書之

遂有事于河

箋按左傳杜注曰有事有祭事也

武王沒成王少周公旦攝政七年制禮作樂神鳥鳳

凰見

箋按說文曰鳳神鳥也

冀茨生乃與成王觀于河洛沉璧

禮畢王退俟至于日昃

箋按昃宋志作昧

榮光竝出幕河青

雲浮至

箋按禮斗威儀曰周成王治平觀于河青雲浮于河

青龍臨壇銜元甲

之圖坐之而去禮于洛亦如之元龜青龍蒼光止于

壇背甲刻書赤文成字周公援筆以世文寫之

箋按周公

攝政七年下至此皆尚書中候文也  
刻書乃列書之訛青龍乃青純之訛  
書成文銷龜隨

甲而去

箋按宋志作墮甲是

其言自周公訖于秦漢盛衰之符

箋按世皆以沈約附注為紀年本文今言自周公訖于秦漢則附注為沈氏之自撰無疑麒麟遊

苑

箋按漢書武帝紀周成康時麒麟在郊藪

鳳凰翔

一作翔

庭成王援琴而

歌曰鳳凰翔兮于紫庭余何德兮以感靈賴先王兮

恩澤臻于胥樂兮民以寧

箋按樂錄曰成王時鳳凰翔舞成王作此歌曰神鳳

採已上並見宋書符瑞志

十九年王巡狩侯甸方岳召康公從

箋按周禮大行人十有二歲王巡守

殷國王制天子五年一巡守鄭氏曰五年者虞夏之制也周則十二年一巡守又按大司馬及師大合軍注曰師為王巡守若會同司馬起師以從召康公之從或亦兼攝司馬也

### 歸于宗周遂正百官

箋按書序成王既黜殷命滅淮夷還歸于豐作周官書曰惟王撫萬

邦巡侯甸四征弗庭綏厥北民六服羣辟罔不承德歸于宗周董正治官是其事也陳氏曰書言歸于宗周乃鎬京非豐也然豐鎬甚近故只以宗周言之兼是時有黜豐侯之事其在豐為無疑也

### 黜豐侯

箋按左傳富辰曰豐文之昭也杜注豐國在始平鄠縣東又三禮圖曰豐國名其君以酒亡國

故崔駰酒箴云豐侯沉酒是也

### 二十一年除治象

箋按周禮太宰之職曰正月之吉始和邦國都鄙乃縣治象之法于象魏

使萬民觀治象小宰之職曰正歲帥治官之屬而觀治象之法是周制一歲既懸治象以示之復觀治象以警之至是而成王除之以法立而民不犯故除之也

周文公薨于豐

箋按書敘曰周文公在豐將沒欲葬成周公薨成王葬于畢告周公作亳姑蓋

成王以薄姑益魯之封故告之周公而因作亳姑以命魯也古亳薄通用

二十二年葬周文公于畢

箋按史記曰周公病將沒曰必葬我成周以明吾不敢離

成王周公既卒成王亦諫葬周公于畢從文王以示余小子不敢臣周公一統志周公墓在咸陽縣北一十五里

二十四年於越來賓

箋按吳越春秋曰少康恐禹祭之絕祀乃封其庶子于越號曰無余

無余質樸不設宮室之飾從民所居春秋祠禹墓于會稽傳世十餘未君微劣不能自立轉從衆庶為編戶之民禹祀斷絕十有餘歲有人生而言語其語曰禽鳥呼嚙喋喋指天向禹墓曰我是無余君之苗末我方修前君祭祀復我禹墓之祀為民請福于天衆民悅喜皆助奉禹祭四時致貢共封立以承越君之後漢書音義曰于南方越名也賀循會稽記曰少康其少子號曰於越越國之稱始此

## 二十五年王大會諸侯于東都四夷來賓

箋按周書王會解成周之

會墀上張赤爽陰羽天子南面立唐叔荀叔周公在左太公望在右旁天子而立于堂上堂下之右唐公虞公南面立焉堂下之左殷公夏公立焉皆南面堂下之東面郭叔掌為天子萊幣焉內臺西面者正北方應侯曹叔伯舅中舅比服次之要服次之荒服次之西方東面正北方伯父中子次之堂後東北為赤



奕馬中臺之外其右秦士臺左彌士外臺之四隅張  
赤奕為諸侯欲息者皆息馬命之曰又閭周公旦主  
東方所之青馬黑獸謂之母兒西面者正北方稷慎  
大塵穢人前兒良夷在于揚州禹發人鹿兪人雖馬  
青丘狐九尾周頭輝玃黑齒白鹿白馬白民乘黃東  
越海蛤歐人鯁蛇姑於越納閩姑妹珍且甌文蠻若  
人玄貝海陽大辯自深桂會稽以鞞皆西嚮正北方  
義渠以茲白史林以尊耳北唐戎以閭閻以諭冠渠  
隻以鮑犬樓煩以星施卜盧以紈牛區陽以鼈封規  
矩以麟西中以鳳鳥北羌鸞鳥巴人以比翼鳥方揚  
以皇鳥蜀人以文輪方人以孔鳥卜人以丹砂夷用  
闕木康民以掇汶州靡費費都郭生生奇幹善芳皆  
東嚮北方臺正東高夷嘍羊獨鹿邛邛距虛孤竹距  
虛不令支玄摸不屠何青能東胡黃羆山戎菽其西  
般吾白虎屠州黑豹禺氏駒駘大夏茲白牛犬戎文  
馬數楚每牛勾戎狡犬皆北嚮權扶三目白州北閭

禽人管路人  
大竹長沙  
鼈其西魚復鼓鐘  
牛蠻揚之  
程倉吾翡翠南人至衆皆北嚮

冬十月歸自東都大事于太廟

箋按周禮太宰職云作大事則戒于百官贊王

命鄭注春秋傳曰國之大事在祀與戎宮正云凡邦之大事令于王宮之官府次舍鄭注大事祭事也春秋傳曰有大事于太廟令据竹書成王九年有事于太廟是禘祭一廟之主二十五年大事于太廟是合祭羣廟之主故孔氏靡詩疏曰春秋文二年八月丁卯大事于太廟公羊傳曰大事者何大禘也毀廟之主陳于太祖未毀廟之主皆升合食于太祖是合祭羣廟之主謂之大事

三十年離戎來賓

箋按水經注戲水出驪山馮公谷又北逕麗戎城陳麗戎男國也姬姓索

隱曰驪山在新豐縣西南故離戎男國也

約按驪戎驪山之戎也為林氏所伐告于成王

箋按周左

史戎夫記云林氏召驪戎之君而朝之至而不禮驪戎逃歸林氏伐之

三十三年王遊于卷阿召康公從歸于宗周

箋按張衡東京賦西

阻九阿穆天子傳天子西征升九阿郭注疑今西安縣十里九坂也詩序卷阿召康公戒成王也言求賢用吉士也豐鶴宗廟所在故謂之宗周書鄴保解周王三十三祀九州之侯咸格于周王在鄴昧爽立于少庭正是時事也

命王世子釗如房逆女

箋按唐書世系表舜封堯子丹朱于房書志房州永清縣有房

山故國也一統志廢永清縣在鄆陽府房縣東一百一十里丹朱封房房為堯後故康王娶于房也其曰

如房逆女者周禮王者殺圭以聘女以王者言之故稱女也公羊傳曰祭公來逆王后于紀以臣下言之

故稱

后也

房伯祈歸于宗周

箋按房國名房伯名祈送女歸于鎬京也桓九年傳曰凡諸侯之女行惟

王后書春秋曰紀

季歸于京師是也

三十四年雨金于咸陽

箋按地理志扶風渭城故咸陽括地志咸陽故城在咸陽縣東

十五里三輔黃圖曰山南為陽水北為陽山水皆在陽故曰咸陽

約按咸陽天雨金三年國有大喪

箋按雨金在辛未王陟在癸酉是三

也年

三十七年夏四月乙丑王陟

箋按書叙曰成王將崩命召公畢公率諸侯相康王

作顧命書曰惟四月哉生魄王不懌乃同召太保奭芮伯彤伯畢公衛侯毛公云云王曰茲予審訓命汝越翼日乙丑王崩漢志曰成王三十年四月庚戌朔十五日甲子哉生魄其說謂周公攝政七年成王即政三十年共三十七年鄭康成謂此年為成王之二十八年章子平編年通載謂成王在位四十七年今据竹書成王在位三十七年陟是漢志不謬也



竹書統箋卷七